

大乘本生心地觀經

三藏法師般若譯

妙諦法音

大乘本生心地觀經

①	序品	3
②	報恩品	28
③	厭捨品	70
④	無垢性品	100
⑤	阿蘭若品	114
⑥	離世間品	122
⑦	厭身品	141
⑧	波羅蜜多品	147
⑨	功德莊嚴品	157
⑩	觀心品	169
⑪	發菩提心品	179
⑫	成佛品	184

⑬	囑累品	190
---	-----------	-----

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

大乘本生心地觀經

① 序品

如是我聞：一時，佛住王舍城耆闍崛山中。

與大比丘眾，三萬二千人。

皆是阿羅漢，心善解脫，慧善解脫，所作已辦，離諸重擔，逮得己利，盡諸有結，得大自在，住清淨戒，善巧方便，智慧莊嚴，證八解脫，到於彼岸。

其名曰：具壽阿若憍陳如、阿史波室多、摩訶那摩波帝利迦、摩訶迦葉、憍梵波提、離波多、優樓頻螺迦葉、那提迦葉、伽耶迦葉、舍利弗、大目犍連、摩訶迦旃延、摩訶迦毗那、真提那、富樓那彌多羅尼子、阿尼樓駄、微妙臂、須菩提、薄拘羅、難陀、孫陀羅難陀、羅睺羅。如是，具壽阿羅漢、有學阿難

陀等。各與若干百千眷屬俱。

各禮佛足，退坐一面。

復有菩薩摩訶薩，八萬四千人俱。

皆是一生補處，大法王子，有大威德，如大龍王。

百福圓滿。身光照曜，猶如千日，破諸昏闇。

智慧澄澈，逾於大海，了達諸佛祕密境界。

燃大法炬，引導眾生。於生死海，作大船師。憐愍眾生，猶如赤子。於一切時，恒施安樂。名稱普聞十方世界。

自在遊戲微妙神通，已能善達諸總持門，具四無礙辯才自在，已得圓滿大願自在，妙善成就事業自在，已能善入三昧自在，具足圓滿福德自在。常為眾生不請之友。

經無量劫，勤修六度。歷事諸佛，不住涅槃。斷諸煩惱，種習皆除。雖生六道，而無過失。現身十方，講說妙法。無量世界，化利群生。制諸外道，摧伏邪心，離斷常因，令生正見。而無往來動搖之相，非嚴而嚴十方佛土。不說而

說，妙理寂然。住無所住，度人天眾。受無所受，廣大法樂。

披精進甲，執智慧劍，破魔軍眾而擊法鼓，身恒遍坐一切道場。

吹大法螺，覺悟群品。一切有情，悉蒙利益。聞名見身，無空過者。具三達智，悟三世法。善知眾生諸根利鈍，應病與藥，無復疑惑。布大法雲，澍甘露雨，轉不退轉智印法輪。閉生死獄，開涅槃門。發弘誓願，盡未來際，度脫群生。

此諸菩薩，不久當得阿耨多羅三藐三菩提。

其名曰：無垢菩薩、彌勒菩薩、師子吼菩薩、妙吉祥菩薩、維摩詰菩薩、觀自在菩薩、得大勢菩薩、金剛藏王菩薩、地藏王菩薩、虛空藏王菩薩、陀羅尼自在王菩薩、三昧自在王菩薩、妙高山王菩薩、大海深王菩薩、妙辯嚴王菩薩、歡喜高王菩薩、大神變王菩薩、法自在王菩薩、清淨雨王菩薩、藥王菩薩、藥上菩薩、療煩惱病菩薩、寶山菩薩、寶財菩薩、寶上菩薩、寶德菩薩、寶藏菩薩、寶積菩薩、寶手菩薩、寶印手菩薩、寶光菩薩、寶施菩薩、寶幢菩薩、大寶幢菩薩、寶雨菩薩、寶達菩薩、寶杖菩薩、寶髻菩薩、寶吉祥菩薩、

寶自在菩薩、梅檀香菩薩、大寶炬菩薩、大寶嚴菩薩、日光菩薩、月光菩薩、星光菩薩、火光菩薩、電光菩薩、能施念慧菩薩、破魔菩薩、勝魔菩薩、常精進菩薩、不休息菩薩、不斷大願菩薩、大名稱菩薩、無礙辯才菩薩、無礙轉法輪菩薩。如是無垢菩薩摩訶薩等，各與若干百千眷屬俱。

復有億萬六欲天子。

其名曰：善住天子、威德天子、普光天子、清淨慧天子、吉祥天子、大吉祥天子、自在天子、大自在天子、日光天子、月光天子。如是等天子。

釋提桓因，而為上首。

悉皆愛樂大乘妙法，願隨奉事三世如來，入不思議祕密境界，莊嚴諸佛眾會道場。

各與若干百千眷屬俱。

復有恒河沙色界天子。

其名曰：大光普照天子、無垢莊嚴天子、神通遊戲天子、三昧自在天子、陀羅尼自在天子、大那羅延天子、圓滿上願天子、無礙辯才天子、吉祥福慧天

子、常發大願天子。如是等天子。

光明大梵天王，而為上首。

悉皆具足三昧神通、樂說辯才，歷事諸佛。三世如來，菩提樹下坐金剛座，破魔軍已，證菩提時，遍至眾會，皆於最初，勸請如來轉妙法輪，開甘露門，度人天眾。善悟諸佛祕密意趣，於大菩提，不復退轉。

各與若干百千眷屬俱。

復有四萬八千諸大龍王。

摩那斯龍王、德叉迦龍王、難陀龍王、跋難陀龍王、阿耨達池龍王、大金面龍王、如意寶珠龍王、雨妙珍寶龍王、常澍甘雨龍王、有大威德龍王、強力自在龍王。如是等龍王。娑竭羅龍王，而為上首。

悉皆愛樂大乘妙法，發弘誓願，恭敬護持。

各與若干百千眷屬俱。

復有五萬八千諸藥叉神。

大師子王藥叉神、日輪光照藥叉神、妙那羅延藥叉神、甚可怖畏藥叉神、蓮

華光色藥叉神、諸根美妙藥叉神、外護正法藥叉神、供養三寶藥叉神、雨眾珍寶藥叉神、摩尼鉢羅藥叉神。如是等諸藥叉神。僧慎爾耶藥叉神，而為上首。

悉皆具足難思智光，難思智炬，難思智行，難思智聚，而為眾生制伏惡鬼，使得安樂，能延福智；守護大乘，令不斷絕。

各與若干百千眷屬俱。

復有八萬九千乾闥婆王。

頂上寶冠乾闥婆王、普放光明乾闥婆王、金剛寶幢乾闥婆王、妙音清淨乾闥婆王、遍至眾會乾闥婆王、普現諸方乾闥婆王、愛樂大乘乾闥婆王、轉不退輪乾闥婆王。如是等乾闥婆王。諸根清淨乾闥婆王，而為上首。

皆於大乘，深生愛敬。利樂眾生，恒無懈倦。

各與若干百千眷屬俱。

復有千億阿修羅王。

羅睺羅阿修羅王、毗摩質多羅阿修羅王、出現威德阿修羅王、大堅固力阿修羅王、美妙音聲阿修羅王、光明遍照阿修羅王、鬥戰恒勝阿修羅王、善巧幻化

阿修羅王。如是等阿修羅王。廣大妙辯阿修羅王，而為上首。

善能修習離諸我慢，受持大乘，尊重三寶。

各與若干百千眷屬俱。

復有五億迦樓羅王。

寶髻迦樓羅王、金剛淨光迦樓羅王、速疾如風迦樓羅王、虛空淨慧迦樓羅王、妙身廣大迦樓羅王、心不退轉迦樓羅王、廣目清淨迦樓羅王、大腹飽滿迦樓羅王、有大威德迦樓羅王、智慧光明迦樓羅王。如是等迦樓羅王。

如意寶光迦樓羅王，而為上首。

悉皆成就不起法忍，善權饒益一切眾生。

各與若干百千眷屬俱。

復有九億緊那羅王。

動地緊那羅王、妙寶華幢緊那羅王、寶樹光明緊那羅王、善法光明緊那羅王、最勝莊嚴緊那羅王、大法光明緊那羅王、受持妙法緊那羅王、妙寶嚴飾緊那羅王、成就妙觀緊那羅王。如是等緊那羅王。

悅意樂聲緊那羅王，而為上首。

皆悉具於清淨妙慧，身心快樂，自在遊戲。

各與若干百千眷屬俱。

復有九萬八千摩睺羅伽王。

妙髻摩睺羅伽王、具大威德摩睺羅伽王、莊嚴寶髻摩睺羅伽王、淨眼微妙摩睺羅伽王、光明寶幢摩睺羅伽王、師子胸臆摩睺羅伽王、如山不動摩睺羅伽王、可愛光明摩睺羅伽王。如是等摩睺羅伽王。

遊戲神通摩睺羅伽王，而為上首。

已能修習善巧方便，令諸眾生永離愛纏。

各與若干百千眷屬俱。

復有他方萬億國土轉輪聖王。

金輪轉輪聖王、銀輪轉輪聖王、銅輪轉輪聖王、鐵輪轉輪聖王。

及與七寶、千子眷屬，莊嚴無量，象馬車乘，無數寶幢、懸大寶幡，花鬘寶蓋、繒綵白拂，種種珍奇、妙寶瓔珞，塗香末香，和合萬種微妙殊香。

各執無價眾寶香鑪，燒大寶香，供養世尊。以妙言詞，稱讚如來甚深智海。

而白佛言：世尊！我今不求三界有漏人天果報，惟求出世阿耨多羅三藐三菩提。所以者何？三界之中，人天福樂，雖處尊位，先世福盡，還生惡趣，受無量苦。誰有智者，樂世間樂？

作是語已，一心合掌。

各與若干百千眷屬俱。

復有十六諸大國王。

迦毗羅國淨飯大王、摩伽陀國頻婆娑羅王、波羅柰國迦斯大王、有于陀國于闐大王、娑羅國主迦毘那王。如是等十六大王及諸小王。

舍衛國主波斯匿王，名曰月光，而為上首。

悉皆具足福智神通。有大威德如轉輪王，一切怨敵自然降伏，人民熾盛，國土豐樂。無量佛所，種諸善根，常為諸佛之所護念。莊嚴劫中，千佛出現，如是諸王，常為施主。賢劫之中，千佛出現，如是諸王，亦為施主。於當來世星宿劫中，千佛出現，當為施主。乃至未來，一切諸佛出現世間，如是諸王，以

本願力，常行檀施，饒益有情，隨宜善入諸方便門。雖作國王，不貪世樂，厭離生死，修解脫因。勤求佛道，愛樂大乘，化利群生，不著諸相，紹三寶種，使不斷絕。

為聽法故，供養如來，廣修珍膳，嚴持香花，來至佛所。

各與一萬二萬，乃至千萬諸眷屬俱。

復有十六大國王夫人。韋提希夫人、妙勝鬘夫人、甚可愛樂夫人、三界無比夫人、福報光明夫人、如意寶光夫人、末利夫人、妙德夫人。如是等夫人。殊勝妙顏夫人，而為上首。

已能善入無量正定。為度眾生，示現女身。以三解脫修習其心。有大智慧，福德圓滿，無緣大慈，無礙大悲。憐愍眾生，猶如赤子。

以本願力，得值世尊。為欲聽法，來詣佛所，瞻仰尊顏，目不暫捨。以無量種人中上供，奉獻世尊。及以無數妙寶瓔珞，供養如來。

各與若干百千眷屬俱。

復有百千無央數人。

比丘、比丘尼，優婆塞、優婆夷，諸婆羅門、刹帝利、薛舍、戍達羅，及諸國界長者、居士，一切人民。

是諸大眾，發清淨信，起殷重心，宿種善根，生值佛法。為求出世，起難遭想。

來詣佛所，一心合掌。

各與若干百千眷屬俱。

復有無數諸外道眾。

苦行外道、多聞外道、世智外道、樂遠離外道、路伽耶陀外道。

路伽耶治迦你外道，而為上首。

成就五通，飛行自在。發希有心，為聽法故，來詣佛所。

各與若干百千眷屬俱。

復有無量無數非人餓鬼。

謂：無財鬼、食人吐鬼、惱眾生鬼、食涕唾鬼、食不飽鬼、毘舍闍鬼、臭極臭鬼、食糞穢鬼、食人胎鬼、食生子鬼、食不淨鬼、生吉祥鬼。如是諸鬼。

毘盧陀伽大鬼神王，而為上首。

捨離毒心，歸佛法僧，悉皆衛護如來正法。

為聽法故，來詣佛所，五體投地，渴仰世尊。

各與若干百千眷屬俱。

復有無量無數禽獸諸王。

命命鳥王、鸚鵡鳥王，及獅子王、象王、鹿王。如是一切諸禽獸王。

金色獅子王，而為上首。

悉皆歸命如來大師。為欲聽法，來詣佛所，各隨願力，供養世尊。

而白佛言：惟願，如來！哀受我等微少供養。永離三塗惡業種子，得受人天福樂果報，開闡大乘甘露法門，速斷愚癡，當得解脫。

時，諸鳥王作是語已，一心合掌，瞻仰如來。

各與若干百千眷屬俱。

復有百千琰魔羅王，與無央數諸大羅刹種種形類，及諸惡王幽冥官屬，校計罪福獄吏刑司，承佛威力，捨離惡心。與琰魔羅王，同來聽法。

而白佛言：一切眾生，以愚癡故，貪五欲樂，造五逆罪，入諸地獄，輪轉無窮。自業所因，受大苦惱，如世蠶繭，自為縈纏。惟願，如來！雨大法雨，滅地獄火。施清涼風，開解脫門，閉三惡趣。

時，琰魔羅王作是語已。種種珍寶供養如來，一心恭敬，遶百千匝。

與若干百千眷屬俱，各禮佛足，退坐一面。

爾時，世尊坐寶蓮花獅子座上。其獅子座，色紺琉璃，種種珍奇間錯嚴飾。頗梨寶珠，以為其莖。紫磨黃金，作蓮花葉。其蓮花臺，以摩尼寶而為花鬚。八萬四千閻浮檀金大寶蓮花，而為眷屬。

為諸大眾，前後圍遶，供養恭敬尊重讚歎。

時，薄伽梵，於獅子座結跏趺坐，威儀殊特。猶如四寶蘇迷盧山處于大海，自然迴出。如百千日，照曜虛空，放無量光，破諸昏暗。亦如俱胝圓滿月輪，獨處眾星，放清涼光，明朗世界。

是時，如來入有頂天極善三昧，名心瓔珞寶莊嚴王。住此定已，身心不動。

時，無色界一切天子，雨無量種微妙花香，於虛空中，如雲而下。

色界諸天十八梵王，雨眾雜色無數天花，百千萬種梵天妙香，遍滿虛空，如雲而下。

六欲諸天，及天子眾，以天福力，雨種種花：優鉢羅花、波頭摩花、拘物頭花、芬陀利花、瞻蔔迦花、阿提目多花、波利尸迦花、蘇摩那花、曼陀羅花、摩訶曼陀羅花、曼殊沙花、摩訶曼殊沙花。於虛空中，繽紛亂墜，而供養佛及眾法寶。又，雨天上無價寶香，其香如雲，作百寶色。以天神力，香氣遍滿此諸世界，供養大會。

爾時，世尊從三昧起。即於本座，復入獅子奮迅三昧。

現大神通，令此三千大千世界六種震動。

謂：動、極動、遍極動，涌、極涌、遍極涌，震、極震、遍極震，擊、極擊、遍極擊，吼、極吼、遍極吼，爆、極爆、遍極爆。

又，此世界，東涌西沒，西涌東沒，南涌北沒，北涌南沒，中涌邊沒，邊涌中沒。其地嚴淨，悉皆柔軟。

滋長卉木，利益群生，令三千界無有地獄餓鬼畜生，及餘無暇惡趣眾生，皆

得離苦。捨此身已，生於人道及六欲天。皆識宿命，歡喜踊躍，同詣佛所。以殷重心，頂禮佛足。持諸珍寶無數瓔珞，悟三輪空，以報佛恩。

爾時，如來於胸臆間及諸毛孔，放大光明，名諸菩薩遊戲神通，使不退轉阿耨多羅三藐三菩提。其光明色，如閻浮檀金。

此金色光，普照三千大千世界，及餘世界。

乃至百億妙高山王，一切雪山、香山、黑山、金山、寶山，及彌樓山、大彌樓山、目真鄰陀山、摩訶目真鄰陀山、小鐵圍山、大鐵圍山，江河大海、流泉浴池，及以百億四大洲界，日月星辰，天宮龍宮、諸尊神宮，並諸國邑王宮聚落，琰魔羅界。所有一切八寒八熱諸地獄中。

罪業眾生，受苦之相。乃至十方畜生、餓鬼受苦之相。一切世間，五趣眾生受苦樂相。如是，皆現於此金色大光明中。

又，此光中，影現菩薩修行佛道種種相貌。

釋迦菩薩，於往昔時，作光明王，最初發於阿耨多羅三藐三菩提心，乃至菩提樹下得成佛道，娑羅林中入於涅槃。

於其中間，三僧企耶百萬劫中。

所有一切慈悲喜捨，八萬四千波羅蜜門。

乃於過去，作金輪王，王四天下，盡大海際，人民熾盛，國土豐樂，正法化世，經無量劫，一切珍寶充滿國界。

時，彼輪王觀諸世間皆悉無常，厭五欲樂，捨輪王位，出家學道。

或於大國，為王愛子，棄捨身命，投於餓虎。

或作尸毘王，割身救鴿。

或救孕鹿，捨鹿王身。

或於雪山，為求半偈，而捨全身。

或現受生於淨飯王家。

棄捨後宮六萬嫔女，及捨種種上妙伎樂，踰城出家。

六年苦行，日食麻麥。

降諸外道，坐菩提樹下，破魔軍已。

得阿耨多羅三藐三菩提。

有如是等百千恒沙難思行願，一切相貌，悉皆頓現於此金色大光明中。

又，此光中，影現如來不可思議八大寶塔：

①拘娑羅國，淨飯王宮，生處寶塔。

②摩伽陀國，伽耶城邊，菩提樹下，成佛寶塔。

③波羅奈國，鹿野園中，初轉法輪，度人寶塔。

④舍衛國中，給孤獨園，與諸外道六月論議，得一切智，聲名寶塔。

⑤安達羅國，曲女城邊，昇忉利天，為母說法。共梵天王，及天帝釋，十二萬眾，從三十三天，現三道寶階，下閻浮時，神異寶塔。

⑥摩竭陀國，王舍城邊，耆闍崛山，說《大般若》、《法花》、《一乘心地經》等，大乘寶塔。

⑦毘舍離國，菴羅衛林，維摩長者，不可思議，現疾寶塔。

⑧拘尸那國，跋提河邊，娑羅林中，圓寂寶塔。

如是八塔，大聖化儀，人天有情所歸依處。供養恭敬，為成佛因。

如是音聲，及諸塔影，而於三世難思議事，悉皆影現大光明中。

又，十方界三世諸佛及大菩薩道場眾會，神通變化，希有之事，及諸如來所說妙法，皆如響應。於此金色大光明中，無不見聞。

一切眾生，遇此光明、見彼瑞相，皆發無等等阿耨多羅三藐三菩提心。

時，諸大眾睹佛神力，不可思議，歎未曾有。

各相謂言：如來，今日，入於三昧，放大光明，照十方界。得見如來往昔所有難思議事，調伏惡世邪見眾生，令生正解，趣向菩提。希有，如來！能為一切世間之父，無量劫中難可得見。我等累劫，修諸行願，得遇三界人天大師。

惟願，慈尊！哀愍世間，從定而起，說甚深法，示教利喜一切眾生。

作是語已，瞻仰尊顏，默然而住。

爾時，會中有一菩薩，名獅子吼，三僧企耶修行福智。

於賢劫中，次補佛處，受灌頂位，作大法王。

四向觀視海會大眾，發大音聲。

而作是言：我於往昔，無量劫中，已發阿耨多羅三藐三菩提心。

歷事恒沙一切諸佛。

曾於第一眾會道場，見不思議神通變化。

未嘗睹此金色光明，影現一切菩薩行願，及現如來種種相貌，令見三世難思議事。

惟願，仁者！一心合掌，瞻仰尊顏。

從定而起，授甘露藥，除熱惱病，令證法身常樂我淨。

是諸如來，有二種法，於三昧中不復久住：一者大慈，二者大悲。

依大慈故，與眾生樂。依大悲故，拔眾生苦。

以是二法，於無數劫，熏修其心，而成正覺。

世間眾生多諸苦惱。

以是因緣，如來不久從三昧起，當為演說心地觀門大乘妙法。

告諸大眾：無求一切人天福樂，速求出世阿耨多羅三藐三菩提。

所以者何？

今日，世尊從胸臆中，放金色光。所照之處，皆如金色。

佛所顯示，意趣甚深。一切世間，聲聞、緣覺，盡思度量，所不能知。

汝等凡夫，不觀自心。是故，漂流生死海中。

諸佛菩薩，能觀心故，度生死海，到於彼岸。

三世如來，法皆如是。放此光明，非無因緣。

是諸眾會，聞大士言，心懷踊躍，得未曾有。

爾時，獅子吼菩薩摩訶薩，欲重宣此義，而說偈言：

敬禮天人大覺尊	恒沙福智皆圓滿	金光百福莊嚴相	發起眾生愛樂心
超過三界獨居尊	功德最勝無倫匹		
普用神通自在力	隨所造業現其前	我以天眼觀世間	一切無有如佛者
希有金容如滿月	希有過於優曇花		
無邊福智利群生	大光普照如千日	愚癡眾生長夜苦	蒙光所照悉皆除
我觀如來昔所行	親近供養無數佛	經歷僧祇無量劫	為眾生故趣菩提
常於生死苦海中	作大船師濟群品	演說甘露真淨法	令入無為解脫門
三僧祇劫度眾生	勤修八萬波羅蜜		
因圓果滿成正覺	住壽凝然無去來	一一相好周法界	十方諸佛相皆然

甚深境界難思議	一切人天莫能測		
諸佛體用無差別	如千燈照互增明	智慧如空無有邊	應物現形如水月
無邊法界常寂然	如如不動等虛空		
如來清淨妙法身	自然具足恒沙德	周遍法界無窮盡	不生不滅無去來
法王常住妙法宮	法身光明靡不照		
如來法性無罣礙	隨緣普應利群生	眾生各見在其前	為我宣說甘露法
隨心能滅諸煩惱	人天眾苦悉皆除	破有法王甚奇特	光明照曜如金山
為度眾生出世間	能燃法炬破昏暗	眾生沒在生死海	輪迴五趣無出期
善逝恒為妙法船	能截愛流超彼岸		
大智方便不可量	恒與眾生無盡樂	能為世間大慈父	憐愍一切諸有情
如來出世甚難值	無數億劫時一現	譬如優曇妙瑞花	一切人天所希有
於無量劫時一現	睹佛出世亦同然		
是諸眾生無福慧	恒處沉淪生死海	億劫不見諸如來	隨諸惡業恒受苦
我等無數百千劫	修四無量三解脫	今見大聖牟尼尊	猶如盲龜值浮木

願於來世恒沙劫	念念不捨天人師	如影隨形不暫離	晝夜勤修於種智
惟願世尊哀愍我	常令得見大慈尊	三業無倦常奉持	願共眾生成正覺
今者三界大導師	座上跏趺入三昧	獨處凝然空寂舍	身心不動如須彌
世間一切梵天魔	莫能警覺如來定	此界他方凡聖眾	悉知調御住於禪
廣設無邊微妙供	奉獻能仁最勝德		
六欲諸天來供養	天花亂墜遍虛空	十善報應無價香	變化香雲百寶色
遍覆人天無量眾	雨雜妙寶獻如來	香氣氛氲三寶前	百千伎樂臨空界
不鼓自鳴成妙曲	供養人中兩足尊		
十八梵眾雨天花	及雨雜寶千萬種	梵摩尼珠妙瓔珞	眾寶嚴飾天妙衣
大寶花幢懸勝幡	持以供養牟尼尊		
無色界天雨寶花	其花廣大如車輪	雨微細香滿世界	供養三昧難思議
龍王修羅人非人	奉獻所感珍妙寶	各以供養天中天	樂聞最勝菩提道
時薄伽梵大醫王	善治世間煩惱苦	獅子頻伸三昧力	
六種震動遍三千	以此覺悟諸有緣	於此無緣了不覺	

隨彼人天應可度	見佛種種諸神通	瞻仰月面牟尼尊	
以淨三業皆雲集	如來能以無緣慈	饒益眾生成勝德	
胸臆放此大光明	名諸菩薩不退轉	如劫盡時七日現	熾然照曜放千光
世間所有諸光明	不及一佛毛孔光	無量無礙大神光	遍照十方諸佛刹
如來福智皆圓滿	所放神光亦無比	其光赫弈如金色	遍照十方諸國土
大聖金光影現中	悉見世間諸色像	三千大千諸世界	所有一切諸山王
四寶所成妙高山	雪山香山七金山	目真鄰陀彌樓山	大鐵圍山小山等
大海江河及浴池	無數百億四大洲	日月星辰眾寶宮	天宮龍宮諸神宮
國邑王宮諸聚落	如是光中悉顯現		
又現如來往昔因	積功累德求佛道	如來昔在尸毘國	曾居尊位作人王
國界珍寶皆充盈	常以正法化於世	慈悲喜捨恒無倦	能捨難捨趣菩提
割身救鵠嘗無悔	深心悲愍救眾生		
時佛往昔在凡夫	入於雪山求佛道	攝心勇猛勤精進	為求半偈捨全身
以求正法因緣故	十二劫超生死苦		

昔為摩納仙人時	布髮供養然燈佛	以是精進因緣故	八劫超於生死海
昔為薩埵王子時	捨所愛身投餓虎	自利利他因緣故	十一劫超生死因
流水長者大醫王	平等救護眾生故	濟魚各得生天上	天雨瓔珞來報恩
七日翹足讚如來	以精進故超九劫		
昔為六牙白象王	其牙殊妙無能比	捨身命故投獵者	求佛無上大菩提
或作圓滿福智王	施眼精進求佛道		
又作金色大鹿王	捨身精進求佛道		
為迦尸國慈力王	全身施與五夜叉		
又作大國莊嚴王	以妻子施無吝惜		
或為最上身菩薩	頭目髓腦施眾生	如是菩薩行慈悲	皆願求證菩提道
佛昔曾作轉輪王	四洲珍寶皆充滿	具足千子諸眷屬	十善化人百千劫
國土安隱如天宮	受五欲樂無窮盡	時彼輪王覺自身	及以世間不牢固
無想諸天八萬歲	福盡還歸諸惡道	猶如夢幻與泡影	亦如朝露及電光
了達三界如火宅	八苦充滿難可出	未得解脫超彼岸	誰有智者樂輪迴

唯有出世如來身	不生不滅常安樂		
如是難行菩薩行	一切悉現金光內		
又此光中現八塔	皆是眾生良福田		
淨飯王宮生處塔	菩提樹下成佛塔	鹿野園中法輪塔	給孤獨園名稱塔
曲女城邊寶階塔	耆闍崛山般若塔	菴羅衛林維摩塔	娑羅林中圓寂塔
如是世尊八寶塔	諸天龍神常供養	金剛密跡四天王	晝夜護持恒不離
若造八塔而供養	現身福壽自延長	增長智慧眾所尊	世出世願皆圓滿
若人禮拜及心念	如是八塔不思議	二人獲福等無差	速證無上菩提道
如是三世利益事	於此光中無不見		
十方佛土諸菩薩	神通遊戲眾靈仙	萬億國土轉輪王	尋此光明普雲集
各以神力來供養	雨如意寶奉慈尊	諸天伎樂百千種	不鼓自然出妙音
天花亂墜滿虛空	眾香普熏於大會	寶幢無數諸瓔珞	持以供養人中尊
微妙伽陀讚如來	善哉能入於三昧	現不思議大神力	調伏難化諸有情
令住堅固不退心	我於佛所深隨喜		

惟願世尊從定起	為諸眾生轉法輪	永斷一切諸煩惱	令住無住大涅槃
如我等類心清淨	從萬億國來聽法		
以三昧力常諦觀	於我微供哀納受	能施所施及施物	於三世中無所得
我等安住最勝心	供養一切十方佛		
世世親近大悲主	恒常奉事大慈尊	以無所得妙善根	圓融法界趣真覺
過去如來入寂定	現大神通轉法輪	今佛世尊亦復然	入定放光同彼佛
是故惟忖釋師子	決定欲說心地門		
若欲遠離生死因	必獲三世真常果	諸人合掌一心待	當入如來安樂宮

② 報恩品

爾時，世尊從三昧安詳而起。

告彌勒菩薩摩訶薩言：善哉！善哉！

汝等大士！諸善男子！為欲親近世間之父，為欲聽聞出世之法，為欲思惟如如之理，為欲修習如如之智，來詣佛所，供養恭敬。

我今演說心地妙法，引導眾生令入佛智。

如是妙法，諸佛如來，過無量劫，時乃說之。如來世尊，出興於世，甚難值遇，如優曇花。假使如來出現於世，說此妙法，亦復為難。

所以者何？一切眾生，遠離大乘菩薩行願，趣向聲聞緣覺菩提，厭離生死，永入涅槃，不樂大乘常樂妙果。

然，諸如來轉於法輪，遠離四失，說相應法：①無非處，②無非時，③無非器，④無非法。

應病與藥，令得復除，即是如來，不共之德。

聲聞、緣覺，未得自在諸菩薩眾，不共之境。

以是因緣，難見難聞。

菩提正道，心地法門。若有善男子善女人聞是妙法，一經於耳，須臾之頃，攝念觀心，熏成無上大菩提種，不久當坐菩提樹王金剛寶座，得成阿耨多羅三藐三菩提。

爾時，王舍大城，有五百長者。

其名曰：妙德長者、勇猛長者、善法長者、念佛長者、妙智長者、菩提長

者、妙辯長者、法眼長者、光明長者、滿願長者。

如是等大富長者，成就正見，供養如來及諸聖眾。

是諸長者，聞是「世尊讚歎大乘心地法門」。

而作是念：我見如來放金色光，影現菩薩難行苦行。我不愛樂行苦行心，誰能永劫住於生死，而為眾生受諸苦惱？

作是念已。即從座起，偏袒右肩，右膝著地，合掌恭敬。

異口同音，前白佛言：世尊！我等不樂大乘諸菩薩行，亦不喜聞苦行音聲。

所以者何？一切菩薩所修行願，皆悉不是知恩報恩。

何以故？

遠離父母，趣於出家。

以自妻子，施於所欲。頭目髓腦，隨其願求，悉皆布施，受諸逼惱。

三僧祇劫，具修諸度八萬四千波羅蜜行，越生死流，方至菩提大安樂處。

不如趣向二乘道果，三生百劫修集資糧，斷生死因，證涅槃果，速至安樂。
方名報恩。

爾時，佛告五百長者：善哉！善哉！汝等聞於讚歎大乘，心生退轉，發起妙義，利益安樂未來世中，不知恩德一切眾生。

諦聽！諦聽！善思念之！我今為汝分別演說世出世間有恩之處。

善男子！汝等所言，未可正理。

何以故？

世間之恩，有其四種：①父母恩，②眾生恩，③國王恩，④三寶恩。

如是四恩，一切眾生平等荷負。

善男子！父母恩者，父有慈恩，母有悲恩。

母悲恩者。若我住世，於一劫中，說不能盡。

我今為汝宣說少分。

假使有人，為福德故，恭敬供養一百淨行大婆羅門、一百五通諸大神仙、一百善友，安置七寶上妙堂內，以百千種上妙珍膳，垂諸瓔珞，眾寶衣服，栴檀沉香。立諸房舍百寶莊嚴，床臥敷具。療治眾病，百種湯藥。一心供養，滿百千劫。

不如一念住孝順心，以微少物，色養悲母，隨所供侍。

比前功德，百千萬分，不可校量。

世間悲母，念子無比，恩及未形。始自受胎，經於十月，行住坐臥，受諸苦惱，非口所宣。雖得欲樂飲食衣服，而不生愛。憂念之心，恒無休息。但自思惟，將欲生產，漸受諸苦，晝夜愁惱。

若產難時，如百千刃，競來屠割，或致無常。

若無苦惱，諸親眷屬喜樂無盡，猶如貧女得如意珠。

其子發聲，如聞音樂。以母胸臆，而為寢處。左右膝上，常為遊履。於胸臆中，出甘露泉。

長養之恩，彌於普天。憐愍之德，廣大無比。

世間所高，莫過山岳。悲母之恩，逾於須彌。

世間之重，大地為先。悲母之恩，亦過於彼。

若有男女，背恩不順，令其父母生怨念心。母發惡言，子即隨墮，或在地獄餓鬼畜生。世間之疾，莫過猛風。怨念之徵，復速於彼。一切如來、金剛、天

等，及五通仙，不能救護。

若善男子善女人，依悲母教，承順無違，諸天護念，福樂無盡。

如是男女，即名尊貴天人種類。或是菩薩為度眾生，現為男女，饒益父母。

若善男子善女人，為報母恩，經於一劫，每日三時，割自身肉，以養父母，而未能報一日之恩。

所以者何？一切男女，處于胎中，口吮乳根，飲啖母血。及出胎已，幼稚之前，所飲母乳，百八十斛。母得上味，先與其子。珍妙衣服，亦復如是。愚癡鄙陋，情愛無二。

昔有女人，遠遊他國，抱所生子，渡殢伽河。其水暴漲，力不能前，愛念不捨，母子俱沒。以是慈心善根力故，即得上生色究竟天，作大梵王。

以是因緣，母有十德：

一名大地。於母胎中，為所依故。

二名能生。經歷眾苦，而能生故。

三名能正。恒以母手，理五根故。

四名養育。隨四時宜，能長養故。

五名智者。能以方便，生智慧故。

六名莊嚴。以妙瓔珞，而嚴飾故。

七名安隱。以母懷抱，為止息故；

八名教授。善巧方便，導引子故。

九名教誡。以善言辭，離眾惡故。

十名與業。能以家業，付囑子故。

善男子！於諸世間，何者最富？何者最貧？

悲母在堂，名之為富。悲母不在，名之為貧。

悲母在時，名為日中。悲母死時，名為日沒。

悲母在時，名為月明。悲母亡時，名為闇夜。

是故，汝等勤加修習孝養父母。若人供佛，福等無異。

應當如是報父母恩。

善男子！眾生恩者，即無始來，一切眾生輪轉五道經百千劫。於多生中，互

為父母。以互為父母故，一切男子即是慈父，一切女人即是悲母。昔生生中，有大恩故，猶如現在父母之恩，等無差別。

如是昔恩，猶未能報。或因妄業生諸違順，以執著故，反為其怨。

何以故？無明覆障宿住智明，不了前生曾為父母，所可報恩，互為饒益。無饒益者，名為不孝。

以是因緣，諸眾生類，於一切時，亦有大恩，實為難報。如是之事，名眾生恩。

國王恩者，福德最勝。雖生人間，得自在故。

三十三天、諸天子等，恒與其力，常護持故。

於其國界，山河大地盡大海際，屬於國王。一人福德，勝過一切眾生福故。是大聖王，以正法化，能使眾生，悉皆安樂。

譬如世間，一切堂殿，柱為根本。人民豐樂，王為根本，依王有故。亦如梵王，能生萬物。聖王能生治國之法，利眾生故。如日天子，能照世間。聖王亦能觀察天下，人安樂故。

王失正治，人無所依。若以正化，八大恐怖不入其國。所謂：他國侵逼、自界叛逆、惡鬼疾病、國土饑饉、非時風雨、過時風雨、日月薄蝕、星宿變怪。人王正化，利益人民。如是八難，不能侵故。

譬如長者，唯有一子，愛念無比，憐愍饒益，常與安樂，晝夜不捨。國大聖王，亦復如是，等視群生，如同一子，擁護之心，晝夜無捨。

如是，人王，令修十善，名福德主。若不令修，名非福主。

所以者何？若王國內，一人修善，其所作福，皆為七分，造善之人，得其五分。於彼國王，常獲二分，善因王修，同福利故。造十惡業，亦復如是，同其事故。一切國內，田地園林，所生之物，皆為七分，亦復如是。

若有人王，成就正見，如法化世，名為天王，以天善法，化世間故。諸天善神，及護世王，常來加護，守王宮故。雖處人間，修行天業，賞罰之心，無偏黨故。一切聖王，法皆如是。如是聖王，名正法王。

以是因緣，成就十德：

一名能照。以智慧眼，照世間故。

二名莊嚴。以大福智，莊嚴國故。

三名與樂。以大安樂，與人民故。

四名伏怨。一切怨敵，自然伏故。

五名離怖。能卻八難，離恐怖故。

六名任賢。集諸賢人，評國事故。

七名法本。萬姓安住，依國王故。

八名持世。以天王法，持世間故。

九名業主。善惡諸業，屬國王故。

十名人主。一切人民，王為主故。

一切國王，以先世福，成就如是十種勝德。

大梵天王及忉利天，常助人王受勝妙樂。諸羅刹王及諸神等，雖不現身，潛來衛護王及眷屬。王見人民造諸不善，不能制止，諸天神等悉皆遠離。若見修善，歡喜讚歎，盡皆唱言：「我之聖王」。龍天喜悅，澍甘露雨，五穀成熟，人民豐樂。

若不親近諸惡人等，普利世間，咸從正化，如意寶珠必現王國。於王鄰國，咸來歸服。人與非人，無不稱歎。

若有惡人，於王國內，而生逆心。於須臾頃，如是之人，福自衰滅，命終當墮地獄之中，經歷畜生，備受諸苦。

所以者何？由於聖王，不知恩故，起諸惡逆，得如是報。

若有人民，能行善心，敬輔仁王，尊重如佛。是人，現世安隱豐樂，有所願求，無不稱心。

所以者何？一切國王，於過去時曾受如來清淨禁戒，常為人王，安隱快樂。

以是因緣，違順果報，皆如響應。聖王恩德，廣大如是。

善男子！三寶恩者，名不思議。利樂眾生，無有休息。

是諸佛身，真善無漏。無數大劫，修因所證。三有業果，永盡無餘。功德寶山，巍巍無比，一切有情所不能知。福德甚深，猶如大海。智慧無礙，等於虛空。神通變化，充滿世間。光明遍照十方三世。

一切眾生，煩惱業障，都不覺知。沉淪苦海，生死無窮。三寶出世，作大船

師，能截愛流，超昇彼岸。諸有智者，悉皆瞻仰。

善男子等！唯一佛寶，具三種身：①自性身，②受用身，③變化身。

第一佛身，有大斷德，二空所顯。一切諸佛，悉皆平等。

第二佛身，有大智德，真常無漏。一切諸佛，悉皆同意。

第三佛身，有大恩德，定通變現。一切諸佛，悉皆同事。

善男子！其自性身，無始無終，離一切相，絕諸戲論，周圓無際，凝然常住。

其受用身，有二種相：①自受用，②他受用。

自受用身，三僧祇劫，所修萬行，利益安樂諸眾生已，十地滿心，運身直往色究竟天，出過三界淨妙國土，坐無數量大寶蓮花。

而不可說海會菩薩前後圍遶。以無垢繒，繫於頂上，供養恭敬，尊重讚歎。如是，名為後報利益。

爾時，菩薩入金剛定，斷除一切微細所知諸煩惱障，證得阿耨多羅三藐三菩提。

如是妙果，名現報利益。是真報身，有始無終，壽命劫數，無有限量，初成正覺，窮未來際，諸根相好，遍周法界。

四智圓滿，是真報身，受用法樂。

①大圓鏡智。轉異熟識，得此智慧，如大圓鏡，現諸色像。如是，如來鏡智之中，能現眾生諸善惡業。以是因緣，此智名為大圓鏡智。依大悲故，恒緣眾生。依大智故，常如法性。雙觀真俗，無有間斷，常能執持無漏根身。一切功德，為所依止。

②平等性智。轉我見識，得此智慧。是以能證，自他平等，二無我性。如是名為平等性智。

③妙觀察智。轉分別識，得此智慧。能觀諸法，自相共相。於眾會前，說諸妙法，能令眾生，得不退轉。以是名為妙觀察智。

④成所作智。轉五種識，得此智慧。能現一切種種化身，令諸眾生，成熟善業。以是因緣，名為成所作智。

如是四智而為上首，具足八萬四千智門。如是一切諸功德法，名為如來自受

用身。

諸善男子！如來他受用身。具足八萬四千相好，居真淨土，說一乘法，令諸菩薩，受用大乘微妙法樂。

一切如來，為化十地諸菩薩眾，現於十種他受用身。

第一佛身，坐百葉蓮花。為初地菩薩，說百法明門。菩薩悟已，起大神通變化，滿於百佛世界，利益安樂無數眾生。

第二佛身，坐千葉蓮花。為二地菩薩，說千法明門。菩薩悟已，起大神通變化，滿於千佛世界，利益安樂無量眾生。

第三佛身，坐萬葉蓮花。為三地菩薩，說萬法明門。菩薩悟已，起大神通變化，滿於萬佛國土，利益安樂無數眾生。

如是，如來漸漸增長，乃至十地他受用身，坐不可說妙寶蓮花，為十地菩薩說不可說諸法明門。菩薩悟已，起大神通變化，滿於不可說佛微妙國土，利益安樂不可宣說不可宣說無量無邊種類眾生。

如是，十身皆坐七寶菩提樹王，證得阿耨多羅三藐三菩提。

諸善男子！一一花葉，各各為一三千世界，各有百億妙高山王，及四大洲、日月星辰，三界諸天，無不具足。一一葉上，諸瞻部洲，有金剛座菩提樹王，其百千萬至不可說大小化佛。

各於樹下，破魔軍已，一時證得阿耨多羅三藐三菩提。

如是，大小諸化佛身，各各具足三十二相、八十種好。

為諸資糧，及四善根諸菩薩等、二乘、凡夫，隨宜為說三乘妙法。

為諸菩薩說應六波羅蜜，令得阿耨多羅三藐三菩提，究竟佛慧。

為求辟支佛者，說應十二因緣法。

為求聲聞者，說應四諦法，度生老病死，究竟涅槃。

為餘眾生，說人天教，令得人天安樂妙果。

諸如是等大小化佛，皆悉名為佛變化身。

善男子！如是二種應化身佛，雖現滅度，而此佛身，相續常住。

諸善男子！如一佛寶，有如是等，無量無邊不可思議利樂眾生廣大恩德。

以是因緣，名為如來。應。正遍知。明行圓滿。善逝。世間解。無上士。調

御丈夫．天人師．佛世尊。

善男子！一佛寶中，具足六種微妙功德：

- ①無上，大功德田。
- ②無上，有大恩德。
- ③無足、二足，及以多足眾生中尊。
- ④極難值遇，如優曇花。
- ⑤獨一出現三千大千世界。
- ⑥世出世間功德圓滿一切義。

依具如是等六種功德，常能利樂一切眾生。是名佛寶不思議恩。

爾時，五百長者白佛言：世尊！如佛所說「一佛寶中，無量化佛充滿世界，利樂眾生。」以何因緣，世間眾生，多不見佛，受諸苦惱？

佛告五百長者：譬如日光天子，放百千光，照明世界，而有盲者不見光明。汝，善男子！於意云何，日光天子，而有過否？

時，長者言：不也，世尊！

佛言：善男子！諸佛如來，常演正法，利樂有情。是諸眾生，常造惡業，都不覺知，無慚愧心，於佛法僧，不樂親近。如是眾生，罪根深重，經無量劫，不得見聞三寶名字。如彼盲者，不睹日光。

若有眾生，恭敬如來，愛樂大乘，尊重三寶。當知是人，業障消除、福智增長、成就善根，速得見佛，永離生死，當證菩提。

諸善男子！如一佛寶，有無量佛。如來所說法寶，亦然。一法寶中，有無量義。

善男子！於法寶中，有其四種：①教法，②理法，③行法，④果法。一切無漏，能破無明煩惱業障。

聲名句文，名為教法。有無諸法，名為理法。戒定慧行，名為行法。為無為果，名為果法。如是四種，名為法寶。引導眾生，出生死海，到於彼岸。

善男子！諸佛所師，即是法寶。

所以者何？三世諸佛，依法修行，斷一切障，得成菩提，盡未來際，利益眾生。

以是因緣，三世如來，常能供養諸波羅蜜微妙法寶。何況三界一切眾生，未得解脫，而不能敬微妙法寶！

善男子！我昔曾為求法人王，入大火坑而求正法。永斷生死，得大菩提。是故：

法寶能破一切生死牢獄。猶如金剛，能壞萬物。

法寶能照癡闇眾生。如日天子，能照世界。

法寶能救貧乏眾生。如摩尼珠，雨眾寶故。

法寶能與眾生喜樂。猶如天鼓，樂諸天故。

法寶能為諸天寶階。聽聞正法，得生天故。

法寶能為堅牢大船。渡生死海，到彼岸故。

法寶猶如轉輪聖王。能除三毒煩惱賊故。

法寶能為珍妙衣服。覆蓋無慚諸眾生故。

法寶猶如金剛甲冑。能破四魔，證菩提故。

法寶猶如智慧利劍。割斷生死，離繫縛故。

法寶正是三乘寶車。運載眾生出火宅故。

法寶猶如一切明燈。能照三塗黑闇處故。

法寶猶如弓箭矛槊。能鎮國界，摧怨敵故。

法寶猶如險路導師。善誘眾生，達寶所故。

善男子！三世如來所說妙法，有如是等難思議事。是名法寶不思議恩。

善男子！世出世間，有三種僧：①菩薩僧，②聲聞僧，③凡夫僧。

文殊師利，及彌勒等，是菩薩僧。如舍利弗、目犍連等，是聲聞僧。

若有成就別解脫戒，真善凡夫，乃至具足一切正見，能廣為他演說開示眾聖道法，利樂眾生。名凡夫僧。

雖未能得無漏戒、定，及慧、解脫，而供養者，獲無量福。

如是三種，名真福田僧。

復有一類，名福田僧。於佛舍利，及佛形像，並諸法僧，聖所制戒，深生敬信。自無邪見，令他亦然。能宣正法，讚歎一乘，深信因果。常發善願，隨其過犯，悔除業障。

當知是人，信三寶力，勝諸外道百千萬倍，亦勝四種轉輪聖王，何況餘類一切眾生！

如鬱金花，雖然萎悴，猶勝一切諸雜類花。

正見比丘亦復如是，勝餘眾生百千萬倍。

雖毀禁戒，不壞正見。以是因緣，名福田僧。

若善男子善女人等，供養如是福田僧者，所得福德，無有窮盡。供養前三真實僧寶，所獲功德，正等無異。

如是四類聖凡僧寶，利樂有情，恒無暫捨。是名僧寶不思議恩。

爾時，五百長者白佛言：世尊！我等今日聞佛法音，得悟三寶，利益世間。

然，今不知「以何義故，說佛法僧得名為寶」？

願佛解說，顯示眾會，及未來世，敬信三寶。一切有情，永斷疑網，得不壞信，令入三寶不思議海。

爾時，佛告諸長者言：善哉！善哉！汝善男子！能問如來甚深妙法。於未來世，利益安樂一切眾生。

譬如世間第一珍寶，具足十義，莊嚴國界，饒益有情。佛法僧寶亦復如是。

①堅牢。如摩尼寶，無人能破。佛法僧寶亦復如是，外道天魔不能破故。

②無垢。世間勝寶，清淨光潔，不雜塵穢。佛法僧寶亦復如是，悉能遠離煩惱塵垢。

③與樂。如天德瓶，能與安樂。佛法僧寶亦復如是，能與眾生世出世樂。

④難遇。如吉祥寶，希有難得。佛法僧寶亦復如是，業障有情，億劫難遇。

⑤能破。如如意寶，能破貧窮。佛法僧寶亦復如是，能破世間諸貧苦故。

⑥威德。如轉輪王所有輪寶，能伏諸怨。佛法僧寶亦復如是，具六神通，降伏四魔。

⑦滿願。如摩尼珠，隨心所求，能雨眾寶。佛法僧寶亦復如是，能滿眾生所修善願。

⑧莊嚴。如世珍寶，莊嚴王宮。佛法僧寶亦復如是，莊嚴法王菩提寶宮。

⑨最妙。如天妙寶，最為微妙。佛法僧寶亦復如是，超諸世間最勝妙寶。

⑩不變。譬如真金，入火不變。佛法僧寶亦復如是，世間八風不能傾動。

佛法僧寶具足無量神通變化，利樂有情，暫無休息。以是義故，諸佛法僧，說名為寶。

善男子！我為汝等，略說四種世出世間有恩之處。汝等當知修菩薩行，應報如是四種之恩。

爾時，五百長者白佛言：世尊！如是四恩，甚為難報。當修何行而報是恩？

佛告諸長者言：善男子！為求菩提，有其三種十波羅蜜：①十種布施波羅蜜多，②十種親近波羅蜜多，③十種真實波羅蜜多。

若有善男子善女人，發阿耨多羅三藐三菩提心。能以七寶，滿於三千大千世界，布施無量貧窮眾生。如是布施，但名布施波羅蜜多，不名真實波羅蜜多。

若有善男子善女人，發大悲心，為求無上正等菩提。以自妻子，施與他人，心無吝惜。身肉手足，頭目髓腦，乃至身命，施來求者。如是布施，但名親近波羅蜜多，未名真實波羅蜜多。

若善男子善女人，發起無上大菩提心，住無所得。勸諸眾生，同發此心。以真實法，一四句偈，施一眾生，使向無上正等菩提。是名真實波羅蜜多。

前二布施，未名報恩。

若善男子善女人，能修如是第三真實波羅蜜多，乃名真實能報四恩。

所以者何？

前二布施，有所得心。第三施者，無所得心。

以真實法，施一切有情，令發無上大菩提心。是人，當得證菩提時，廣度眾生，無有窮盡。紹三寶種，使不斷絕。以是因緣，名為報恩。

爾時，五百長者從佛聞是「昔所未聞報恩之法」，心懷踊躍，得未曾有。發心求趣無上菩提，得忍辱三昧，入不思議智，永不退轉。

爾時，會中八萬四千眾生，發菩提心，得堅固信，及此三昧。海會大眾，悉得金剛忍辱三昧，悟無生忍，及柔順忍，或證初地，得不起忍。無量眾生，發菩提心，住不退位。

爾時，佛告五百長者：未來世中，一切眾生，若有得聞此《心地觀·報四恩品》，受持讀習，解說書寫，廣令流布。

如是人等，福智增長，諸天衛護，現身無疾，壽命延長。

若命終時，即得往生彌勒內宮，睹白毫相，超越生死，龍花三會當得解脫。
十方淨土，隨意往生，見佛聞法，入正定聚。

速成阿耨多羅三藐三菩提如來智慧。

爾時，王舍大城，東北八十由旬，有一小國，名增長福。

於彼國中，有一長者，名曰智光。其年衰邁，唯有一子。其子惡性，不順父母，所有教誨，皆不能從。

遙聞「釋迦牟尼如來，在王舍城耆闍崛山，為濁惡世無量眾生，宣說大乘報恩之法。」

父母及子，並諸眷屬，為聽法故，齎持供具，來詣佛所，供養恭敬。

而白佛言：我有一子，其性弊惡，不受父母所有教誨。今聞佛說報四種恩。為聽法故，來詣佛所。

惟願，世尊！為我等類及諸眷屬，宣說四恩甚深妙義，令彼惡子生孝順心。此世當生，令得安樂。

爾時，佛告智光：善哉！善哉！汝為法故來至我所，供養恭敬，樂聞是法。

汝等諦聽，善思念之。

若有善男子善女人，發菩提心，為聞法要，舉足下足，隨其遠近所踐之地，微塵數量，以是因緣，感得金輪轉輪聖王。聖王報盡，作欲天王。欲天報盡，作梵天王。見佛聞法，速證妙果。

汝大長者及餘眾等，為於法故，來至我所，如是經過八十由旬，大地微塵，一一塵數，能感人天輪王果報。既聞法已，當來證得阿耨多羅三藐三菩提。

我雖先說甚深四恩微妙義趣，今復為汝，重宣此義。而說偈言：

最勝法王大聖主	一切人天無等倫		
具諸相好以嚴身	智海如空無有量	自他利行皆圓滿	名稱普聞諸國土
永斷煩惱餘習氣	善持密行護諸根	百四十種不共德	廣大福海悉圓滿
三昧神通皆具足	八自在宮常遊樂	十方人天及外道	無有能難調御師
金口能宣無礙辯	雖無能問而自說	如大海潮時不失	亦如天鼓稱天心
如是自在唯佛有	非五通仙魔梵等	難思劫海修行願	證獲如是大神通
我入三昧大寂室	觀察諸根及藥病		

自出禪定而讚歎	三世佛法心地門		
時諸長者退大心	樂住二乘自利行		
我開大智方便教	引入三空解脫門		
如來意趣莫能量	唯佛能知真祕密		
利根聲聞及獨覺	勤求不退諸菩薩	十二劫數共度量	無有能知其少分
假使十方凡聖智	授與一人為智者	如是智者如竹林	不能測量其少分
世間凡夫無慧眼	迷於恩處失妙果	五濁惡世諸眾生	不悟深恩恒背德
我為開示於四恩	令入正見菩提道		
慈父悲母長養恩	一切男女皆安樂	慈父恩高如山王	悲母恩深如大海
若我住世於一劫	說悲母恩不能盡	我今略說於少分	猶如蚊虻飲大海
假使有人為福德	供養淨行婆羅門	五通神仙自在者	大智師長及善友
安置七珍為堂殿	及以牛頭栴檀房	百寶臥具各敷陳	世間美味如甘露
療治萬病諸湯藥	盛滿金銀器物中	如是供養日三時	乃至數盈於百劫
不如一念申少分	供養悲母大恩田	福德無邊不可量	算分喻分皆無比

世間悲母孕其子	十月懷胎長受苦	於五欲樂情不著	隨時飲食亦同然
晝夜常懷悲愍心	行住坐臥受諸苦		
若正誕其胎藏子	如攢鋒刃解肢節	迷惑東西不能辯	遍身疼痛無所堪
或因此難而命終	六親眷屬咸悲惱	如是眾苦皆由子	憂悲痛切非口宣
若得平復身安樂	如貧獲寶喜難量	顧視容顏無厭足	憐念之心不暫捨
母子恩情常若是	出入不離胸臆前	母乳猶如甘露泉	長養及時曾無竭
慈念之恩實難比	鞠育之德亦難量	世間大地稱為重	悲母恩重過於彼
世間須彌稱為高	悲母恩高過於彼	世間速疾唯猛風	母心一念過於彼
若有眾生行不孝	令母暫時起恨心	怨念之辭少分生	子乃隨言遭苦難
一切佛與金剛天	神仙祕法無能救		
若有男女依母教	承順顏色不相違	一切災難盡消除	諸天擁護常安樂
若能承順於悲母	如是男女悉非凡	大悲菩薩化人間	示現報恩諸方便
若有男子及女人	為報母恩行孝養	割肉刺血常供給	如是數盈於一劫
種種勤修於孝道	猶未能報暫時恩		

十月處於胎藏中	常銜乳根飲脂血	自為嬰孩及童子	所飲母乳百斛餘
飲食湯藥妙衣服	子先母後為常則	子若愚癡人所惡	母亦恩憐不棄遺
昔有女人抱其子	渡於恒河水瀑流	以泛水故力難前	與子俱沒無能捨
為是慈念善根力	命終上生於梵天	長受梵天三昧樂	得遇如來受佛記
是故悲母有十德	隨應義利立其名		
一名大地二能生	三能正者四養育	五與智者六莊嚴	七名安隱八教授
九教誡者十與業	餘恩不過於母恩		
何法世間最富有	何法世間最貧無	母在堂時為最富	母不在時為最貧
母在之時為日中	悲母亡時為日沒	母在之時皆圓滿	悲母亡時悉空虛
世間一切善男女	恩重父母如丘山	應當孝敬恒在心	知恩報恩是聖道
不惜身命奉甘旨	未曾一念虧色養	如其父母奄喪時	將欲報恩誠不及
佛昔修行為慈母	感得相好金色身	名聞廣大遍十方	一切人天咸稽首
人與非人皆恭敬	自緣往昔報慈恩		
我昇三十三天宮	三月為母說真法		

令母聽聞歸正道	悟無生忍常不退	如是皆為報悲恩	雖報恩深猶未足
神通第一目犍連	已斷三界諸煩惱	以神通力觀慈母	見在受苦餓鬼中
目連自往報母恩	救免慈親所受苦	上生他化諸天眾	共為遊樂處天宮
當知父母恩最深	諸佛聖賢咸報德	若人至心供養佛	復有精勤修孝養
如是二人福無異	三世受報亦無窮		
世人為子造諸罪	墮在三塗長受苦		
男女非聖無神通	不見輪迴難可報	哀哉世人無聖力	不能拔濟於慈母
以是因緣汝當知	勤修福利諸功德	以其男女追勝福	有大金光照地獄
光中演說深妙音	開悟父母令發意		
憶昔所生常造罪	一念悔心悉除滅		
口稱南無三世佛	得脫無暇苦難身	往生人天長受樂	見佛聞法當成佛
或生十方淨土中	七寶蓮花為父母	花開見佛悟無生	不退菩薩為同學
獲六神通自在力	得入菩提微妙宮		
皆是菩薩為男女	乘大願力化人間	是名真報父母恩	汝等眾生共修學

有情輪迴生六道	猶如車輪無始終	或為父母為男女	世世生生互有恩
如見父母等無差	不證聖智無由識	一切男子皆是父	一切女人皆是母
如何未報前世恩	卻生異念成怨嫉	常須報恩互饒益	不應打罵致怨嫌
若欲增修福智門	晝夜六時當發願	願我生生無量劫	得宿住智大神通
能知過去百千生	更相憶識為父母	循環六趣四生中	令我一念常至彼
為說妙法離苦因	使得人天長受樂	勸發堅固菩提願	修行菩薩六度門
永斷二種生死因	疾證涅槃無上道		
十方一切諸國王	正法化人為聖主	國王福德為最勝	所作自在名為天
三十三天及餘天	恒將福力助王化	諸天擁護如一子	以是得稱天子名
世間以王為根本	一切人民為所依	猶如世間諸舍宅	柱為根本而成立
王以正法化人民	如大梵王生萬物	王行非法無政理	如琰魔王滅世間
王所容受奸邪人	象蹋花池等無異	勿謂時逢濁惡世	當知善惡是王修
如日天子照世間	國王化世亦如是	日光夜分雖不照	能使有情得安樂
王以非法化於世	一切人民無所依	世間所有諸恐怖	依王福力不能生

人民所成安隱樂	當知是王福所及	世間所有勝妙花	依王福力而開敷
世間所有妙園林	依王福力皆滋茂	世間所有諸藥草	依王福力瘥諸疾
世間百穀及苗稼	依王福力皆成實	世間人民受豐樂	依王福力常自然
譬如長者有一子	智慧端嚴世無比	父母恩愛如眼目	晝夜常生護念心
國大聖王亦如是	愛念眾生如一子	養育耆年拯孤獨	賞罰之心常不二
如是仁王為聖主	群生敬仰等如來		
仁王化治國無災	萬姓恭勤常安隱	國王無法化於世	疾疫流行災有情
如是一切人非人	罪福昭然無所覆		
善惡法中分七分	造者獲五王得二	園林田宅悉皆然	所稅等分亦如是
轉輪聖王出現時	分作六分王得一	時諸人民得五分	善惡業報亦皆然
若有人王修正見	如法化世名天主	以依天法化世間	毘沙門王常擁護
及餘三天羅刹眾	皆當守護聖王宮		
聖王出世理國時	饒益眾生成十德		
一名能照於國界	二名莊嚴於國土	三名能與諸安樂	四名能伏諸怨敵

五名能遮諸恐怖	六名修集諸聖賢	七名諸法為根本	八名護持於世間
九名能作造化功	十名國界人民主		
若王成就十勝德	梵王帝釋及諸天	夜叉羅刹鬼神王	隱身常來護國界
龍王歡喜降甘雨	五穀成熟萬姓安	國中處處生珍寶	人馬強力無怨敵
如意寶珠現王前			
境外諸王自賓伏			
若生不善於王國	一念起心成眾惡	是人命終墮地獄	受苦永劫無出期
若有勤誠助國王	諸天護念增榮祿		
智光長者汝應知	一切人王業所感	諸法無不因緣成	若無因緣無諸法
說無生天及惡趣	如是之人不了因	無因無果大邪見	不知罪福生妄計
王今所受諸福樂	往昔曾持三淨戒	戒德熏修所招感	人天妙果獲王身
若人發起菩提心	願力資成無上果	堅持上品清淨戒	起居自在為法王
神通變化滿十方	隨緣普濟諸群品		
中品受持菩薩戒	福德自在轉輪王	隨心所作盡皆成	無量人天悉遵奉

下上品持大鬼王	一切非人咸率伏	受持戒品雖缺犯	由戒勝故得為王
下中品持禽獸王	一切飛走皆歸伏	於清淨戒有缺犯	由戒勝故得為王
下下品持琰魔王	處地獄中常自在	雖毀禁戒生惡道	由戒勝故得為王
以是義故諸眾生	應受菩薩清淨戒	善能護持無缺犯	隨所生處作人王
若有不受如來戒	尚不能得野干身	何況能感人天中	最勝快樂居王位
是故王者非無因	戒業精勤成妙果	國王自是人民主	慈恤如母養嬰兒
如是人王有大恩	撫育之心難可報		
以是因緣諸有情	若能修證大菩提	於諸眾生起大悲	應受如來三聚戒
若欲如法受戒者	應當懺罪令消滅		
起罪之因有十緣	身三口四及意三	生死無始罪無窮	煩惱大海深無底
業障峻極如須彌	造業由因二種起	所謂現行及種子	藏識持緣一切種
如影隨形不離身	一切時中障聖道		
近障人天妙樂果	遠障無上菩提果	在家能招煩惱因	出家亦破清淨戒
若能如法懺悔者	所有煩惱悉皆除		

猶如劫火壞世間	燒盡須彌並巨海	懺悔能燒煩惱薪	懺悔能往生天路
懺悔能得四禪樂	懺悔雨寶摩尼珠	懺悔能延金剛壽	懺悔能入常樂宮
懺悔能出三界獄	懺悔能開菩提花	懺悔見佛大圓鏡	懺悔能至於寶所
若能如法懺悔者	當依二種觀門修	一者觀事滅罪門	二者觀理滅罪門
觀事滅罪有其三	上中下根為三品		
若有上根求淨戒	發大精進心無退	悲淚泣血常精懇	哀感遍身皆血現
繫念十方三寶所	並餘六道諸眾生	長跪合掌心不亂	發露洗心求懺悔
惟願十方三世佛	以大慈悲哀愍我	我處輪迴無所依	生死長夜常不覺
我在凡夫具諸縛	狂心顛倒遍攀緣	我處三界火宅中	妄染六塵無救護
我生貧窮下賤家	不得自在常受苦	我生邪見父母家	造罪依於惡眷屬
惟願諸佛大慈尊	哀愍護念如一子	一懺不復造諸罪	三世如來當證明
如是勇猛懺悔者	名為上品求淨戒		
若有中根求戒者	一心勇猛懺諸罪	涕淚交橫不覺知	遍身流汗哀求佛
發露無始生死業	願大悲水洗塵勞	滌除罪障淨六根	施我菩薩三聚戒

我願堅持不退轉	精修度脫苦眾生	自未得度先度他	盡未來際常無斷
如是精勤勇猛者	不惜身命求菩提	能感三寶靈異相	是名中品大懺悔
若有下根求淨戒	發起無上菩提心	涕淚悲泣身毛豎	於所造罪深慚愧
對於十方三寶所	及以六道眾生前	至誠發露無始來	所有惱亂諸眾生
起於無礙大悲心	不惜身命悔三業	已作之罪皆發露	未作之惡更不造
如是三品懺諸罪	皆名第一清淨戒	以慚愧水洗塵勞	身心俱為清淨器
諸善男子汝當知	已說淨觀諸懺悔	於其事理無差別	但以根緣應不同
若欲修習觀正理	遠離一切諸散亂	著新淨衣跏趺坐	攝心正念離諸緣
常觀諸佛妙法身	體性如空不可得	一切諸罪性皆如	顛倒因緣妄心起
如是罪相本來空	三世之中無所得	非內非外非中間	性相如如俱不動
真如妙理絕名言	唯有聖智能通達	非有非無非有無	非不有無離名相
周遍法界無生滅	諸佛本來同一體		
惟願諸佛垂加護	能滅一切顛倒心	願我早悟真性源	速證如來無上道
若有清信善男子	日夜能觀妙理空	一切罪障自消除	是名最上持淨戒

若人觀知實相空	能滅一切諸重罪	猶如大風吹猛火	能燒無量諸草木
諸善男子真實觀	名為諸佛祕要門	若欲為他廣分別	無智人中勿宣說
一切凡愚眾生類	聞必生疑心不信	若有智者生信解	念念觀察悟真如
十方諸佛皆現前	菩提妙果自然證	善男子等我滅後	未來世中淨信者
於二觀門常懺悔	當受菩薩三聚戒		
若欲受持上品戒	應請戒師佛菩薩	請我釋迦牟尼佛	當為菩薩戒和尚
龍種淨智尊王佛	當為淨戒阿闍梨	未來導師彌勒佛	當為清淨教授師
現在十方兩足尊	當為清淨證戒師	十方一切諸菩薩	當為修學戒伴侶
釋梵四王金剛天	當為學戒外護眾		
奉請如是佛菩薩	及以現前傳戒師		
普為報於四恩故	發起清淨菩提心	應受菩薩三聚戒	饒益一切有情戒
修攝一切善法戒	修攝一切律儀戒	如是三聚清淨戒	三世如來所護念
無聞非法諸有情	無量劫中未聞見		
唯有過去十方佛	已受淨戒常護持	二障煩惱永斷除	獲證無上菩提果

未來一切諸世尊	守護三聚淨戒寶	斷除三障並習氣	當證正等大菩提
現在十方諸善逝	俱修三聚淨戒因	永斷生死苦輪迴	得證三身菩提果
超越生死深大海	菩薩淨戒為船筏	永斷貪瞋癡繫縛	菩薩淨戒為利劍
生死嶮道諸怖畏	菩薩淨戒為舍宅	息除貧賤諸苦因	淨戒能為如意寶
鬼魅所著諸疾病	菩薩淨戒為良藥		
人天為王得自在	三聚淨戒作良緣	及餘四趣諸王身	淨戒為緣獲勝果
是故能修自在因	當得為王受尊貴	應先禮敬十方佛	日夜增修清淨戒
諸佛護念常受持	戒等金剛無破壞		
三界諸天諸善神	衛護王身及眷屬	一切怨敵皆歸伏	萬姓歡娛感王化
是故受持菩薩戒	感世出世無為果		
三寶常住化於世	恩德廣大不思議	過未及現劫海中	功德利生無休息
佛日千光恒照世	利益群生度有緣	無緣不睹佛慈光	猶如盲者無所見
法寶一味無變易	前佛後佛說皆同	如雨一味普能霑	草木滋榮大小別
眾生隨根各得解	草木稟潤亦差殊		

菩薩聲聞化眾生	如大河水流不竭	眾生無信化不被	如處幽冥日難照
如來月光甚清涼	能除眾暗亦如是	猶如覆盆月不照	迷惑眾生亦如是
法寶甘露妙良藥	能治一切煩惱病	有信服藥證菩提	無信隨緣墮惡道
菩薩聲聞常在世	無數方便度眾生	若有眾生信樂心	各入三乘安樂位
如來不出於世間	一切眾生入邪道	永離甘露飲毒藥	長溺苦海無出期
佛日出現三千界	放大光明照長夜	眾生如睡不覺知	蒙光得入無為室
如來未說一乘法	十方國土悉空虛	發心修行成正覺	一切佛土皆嚴淨
一乘法寶諸佛母	三世如來從此生	般若方便無間修	解脫道成登妙覺
若佛菩薩不出現	世間眾生無導師	生死嶮難無由過	如何得至於寶所
以大願力為善友	常說妙法令修行	趣向十地證菩提	善入涅槃安樂處
大悲菩薩化世間	方便引導眾生故	內祕一乘真實行	外現緣覺及聲聞
鈍根小智聞一乘	怖畏發心經多劫	不知身有如來藏	唯欣寂滅厭塵勞
眾生本有菩提種	悉在賴耶藏識中	若遇善友發大心	三種鍊磨修妙行
永斷煩惱所知障	證得如來常住身	菩提妙果不難成	真善知識實難遇

一切菩薩修勝道	四種法要應當知		
親近善友為第一	聽聞正法為第二	如理思量為第三	如法修證為第四
十方一切大聖主	修是四法證菩提		
汝諸長者大會眾	及未來世清信士	如是四法菩薩地	要當修習成佛道
善男子等應諦聽	如來所說四恩者		
佛寶之恩最為上	為度眾生發大心	三僧企耶大劫中	具修百千諸苦行
功德圓滿遍法界	十地究竟證三身		
法身體遍諸眾生	萬德凝然性常住	不生不滅無來去	不一不異非常斷
法界遍滿如虛空	一切如來共修證	有為無為諸功德	依止法身常清淨
法身本性如虛空	遠離六塵無所染	法身無形離諸相	能相所相悉皆空
如是諸佛妙法身	戲論言辭相寂滅	遠離一切諸分別	心行處滅體皆如
為欲證得如來身	菩薩善修於萬行	智體無為真法性	色心一切諸佛同
譬如飛鳥至金山	能使鳥身同彼色	一切菩薩如飛鳥	法身佛體類金山
自受用身諸相好	一一遍滿十方刹	四智圓明受法樂	前佛後佛體皆同

雖遍法界無障礙	如是妙境不思議	是身常住報佛土	自受法樂無間斷
他受用身諸相好	隨機應現無增減		
為化地上諸菩薩	一佛現於十種身	隨所應現各不同	展轉倍增至無極
稱根為說諸法要	令受法樂入一乘	彼獲神通漸增長	所悟法門亦如是
下地菩薩起智慧	不能了達於上地	能化所化隨地增	各隨本緣為所屬
或一菩薩多佛化	或多菩薩一佛化		
如是十佛成正覺	各坐七寶菩提樹	前佛入滅後佛成	不同化佛經劫現
十佛所坐蓮花臺	周遍各有百千葉	一一葉中一佛土	即是三千大千界
一一界中有百億	日月星辰四大洲	六欲諸天及四禪	空處識處非想等
其四洲中南瞻部	一一各有金剛座	及以菩提大樹王	爾所變化諸佛身
一時證得菩提道	轉妙法輪於大千	菩薩緣覺及聲聞	隨所根宜成聖果
如是所說三身佛	最上無比名為寶		
應化二身所說法	教理行果為法寶		
諸佛以法為大師	修心所證菩提道	法寶三世無變易	一切諸佛皆歸學

我今頂禮薩婆若	故說法寶為佛師	或入猛火不能燒	應時即得真解脫
法寶能摧生死獄	猶如金剛碎萬物	法寶能照眾生心	如日天子臨空界
法寶能作堅牢船	能渡愛河超彼岸	法寶能與眾生樂	譬如天鼓應天心
法寶能濟眾生貧	如摩尼珠雨眾寶	法寶能為三寶階	聞法修因生上界
法寶金輪大聖王	以大法力破四魔	法寶能為大寶車	能運眾生出火宅
法寶能為大導師	能引眾生至寶所	法寶能吹大法螺	覺悟眾生成佛道
法寶能為大法燈	能照生死諸黑闇	法寶能為金剛箭	能鎮國界伏諸怨
三世如來所說法	能利眾生脫苦縛	引入涅槃安樂城	是名法寶恩難報
智光長者汝諦聽	世出世僧有三種	菩薩聲聞聖凡眾	能益眾生為福田
文殊師利大聖尊	三世諸佛以為母	十方如來初發心	皆是文殊教化力
一切世界諸有情	聞名見身及光相	並見隨類諸化現	皆成佛道難思議
彌勒菩薩法王子	從初發心不食肉	以是因緣名慈氏	為欲成熟諸眾生
處於第四兜率天	四十九重如意殿	晝夜恒說不退行	無數方便度人天
八功德水妙花池	諸有緣者悉同生	我今弟子付彌勒	龍花會中得解脫

於末法中善男子	一搏之食施眾生	以是善根見彌勒	當得菩提究竟道
舍利弗等大聲聞	智慧神通化群生		
若能成就解脫戒	真是修行正見人	為他說法傳大乘	如是福田為第一
或有一類凡夫僧	戒品不全生正見	讚詠一乘微妙法	隨犯隨悔障消除
為諸眾生成佛因	如是凡夫亦僧寶	如鬱金花雖萎悴	猶勝一切諸妙花
正見比丘亦如是	四種輪王所不及		
如是四類聖凡僧	利樂有情無暫歇	稱為世間良福田	是名僧寶大恩德
如我所說四恩義	是名能造世間因	一切萬物從是生	若離四恩不可得
譬如世間諸色塵	能造四大而得生	有情世間亦復然	由彼四恩得安立

爾時，智光長者及諸子等聞佛所說四種大恩，得未曾有，歡喜合掌。

而白佛言：善哉！善哉！大慈世尊！為濁惡世，不信因果、不孝父母、邪見眾生，說真妙法，利樂世間。

惟願，世尊！說報恩義。我等既悟甚深四恩，而今未知修何善業而報是恩。

佛告長者：善男子等！我為五百長者先已廣說。

而今為汝，略說少分。

若善男子善女人為得阿耨多羅三藐三菩提，精勤修行十波羅蜜。若有所得，未名報恩。若人須臾，能行一善，心無所得，乃名報恩。

所以者何？一切如來，觸無所得，乃成佛道，化諸眾生。

若有淨信善男子等得聞是經，信解受持、解說書寫，以無所得，三輪體空，竊為一人說四句法，除邪見心，趣向菩提。是即名為報於四恩。

何以故？是人當得無上菩提，展轉教化無量眾生，令入佛道。三寶種子，永不斷絕。

爾時，智光長者聞是偈已，得忍辱三昧，厭離世間，得不退轉。

時，諸子等八千人俱，得此三昧，皆發無等等阿耨多羅三藐三菩提心。

四萬八千人亦證三昧，遠塵離垢，得法眼淨。

③ 厭捨品

爾時，智光長者，承佛威神，即從座起，頂禮佛足，恭敬合掌。

而白佛言：世尊！我今從佛聞是「報恩甚深妙法」，心懷踊躍，得未曾有。

如飢渴人，遇甘露食。我今樂欲酬報四恩，投佛法僧，出家修道，常勤精進，希證菩提。

佛大慈悲，於一時中，在毘舍離城，為無垢稱說甚深法：「汝無垢稱！以清淨心，為善業根。以不善心，為惡業根。心清淨故，世界清淨。心雜穢故，世界雜穢。我佛法中，以心為主。一切諸法，無不由心。

汝今在家，有大福德。眾寶瓔珞，無不充足。男女眷屬，安隱快樂。成就正見，不謗三寶。以孝養心，恭敬尊親。起大慈悲，給施孤獨。乃至螻蛄，尚不加害。忍辱為衣，慈悲為室。尊敬有德，心無憍慢。憐愍一切，猶如赤子。不貪財利，常修喜捨。供養三寶，心無厭足。為法捨身，而無吝惜。

如是，白衣雖不出家，已具無量無邊功德。

汝於來世，萬行圓滿，超過三界，證大菩提。汝所修心，即真沙門，亦婆羅門，是真比丘，是真出家。如是之人，此則名為在家出家。」

世尊！或有一時，於迦蘭陀竹林精舍，為其惡性六群比丘，說教誡法。

而告之言：「汝等比丘！諦聽！諦聽！入佛法海，信為根本，渡生死河，戒

為船筏。若人出家，不護禁戒，貪著世樂，毀佛戒寶，或失正見，入邪見林，引無量人墮大深坑。如是比丘，不名出家，非是沙門非婆羅門。形似沙門，心常在家。如是沙門，無遠離行。

遠離之行，有其二種：①身遠離，②心遠離。

身遠離者。若人出家，身處空閒，不染欲境，名身遠離。

若有出家，修清淨心，不染欲境，名心遠離。

身雖出家，心貪欲境，如是之人，不名遠離。

若淨信男，及淨信女，身居聚落，發無上心，以大慈悲，饒益一切，如是修行，名真遠離。」

於是，六群惡性比丘聞是法音，得柔順忍。

然，今我等雖信佛說，各各懷疑，意未決定。

善哉！世尊！能斷世間一切疑者。於一切法，得自在者、真實語者、無二語者、是知道者、是開道者。

惟願，如來！為我等輩，及未來世一切有情，捨於方便，說真實法。永離疑

悔，令入佛道。

今此會中，有二菩薩：①出家，②在家。

是二菩薩，善能利樂一切有情，而無休息。

如我惟忖，出家菩薩，不及在家修菩薩行。

所以者何？

昔有金輪轉輪聖王，發阿耨多羅三藐三菩提心，厭離世間，無常苦空。捨輪王位，如棄涕唾，清淨出家，入於佛道。

是時，後宮夫人嫫女，八萬四千，見王出家，各懷戀慕，拊心號慟，生大逼惱。起愛別離，如地獄苦。

金輪聖王初受位時，所感寶女及王千子大臣眷屬，共傷離別，捨位出家，號泣之聲，滿四天下。

此諸眷屬各作是言：「我王福智，無量無邊。如何見棄，捨我出家？哀哉！苦哉！世界空虛，從今已去，無依無怙。」

若有淨信善男子善女人，歸佛法僧，發菩提心，捨離父母，出家入道。

父母憐愍，恩念情深，離別悲哀，感動天地。如涸轍魚，宛轉于地。愛別離苦亦復如是。如彼輪王眷屬之心。

出家菩薩饒益眾生，云何燒害父母妻子，令無量人受大苦惱？

以是因緣，出家菩薩，無慈無悲，不利眾生。

是故，非如在家菩薩，具大慈悲，憐愍眾生，利益一切。

爾時，佛告智光長者：善哉！善哉！汝大慈悲，勸請我說「出家在家二種勝劣」。汝今所問「出家菩薩不如在家」，是義不然。

所以者何？出家菩薩，勝於在家，無量無邊，不可為比。

何以故？出家菩薩，以正慧力，微細觀察在家所有種種過失。

所謂：世間一切舍宅積聚其中，不知滿足。猶如大海，容受一切大小河水，未曾滿足。

善男子！香山之南雪山之北，有阿耨池。四大龍王，各居一角。

東南龍王白象頭，西南龍王水牛頭，西北龍王獅子頭，東北龍王大馬頭。

各從四角，涌出大河：

①殞伽河，其水所至，白象隨出。

②信渡河，其水所至，水牛隨出。

③薄芻河，其水所至，獅子隨出。

④私陀河，其水所至，大馬隨出。

如是大河，一一河各有五百中河。中河各有無量小河，是大中小一切眾水，皆入大海。

然，此大海，未曾滿足。

世間眾生，所有一切，居處舍宅，亦復如是。

聚諸珍寶，從四方來，悉入宅中，未曾滿足。多求積聚，造種種罪。無常忽至，棄捨故宅。

是時，宅主隨業受報，經無量劫，終無所歸。

善男子！所為宅者，即五蘊身。其宅主者，是汝本識。

誰有智者，樂有為宅？唯有菩提安樂寶宮，離老病死憂悲苦惱。

若有利根淨信深厚善男子等，欲度父母妻子眷屬，令入無為甘露宅者，須歸

三寶，出家學道。

爾時，如來重說偈言：

出家菩薩勝在家	算分喻分莫能比		
在家逼迫如牢獄	欲求解脫甚為難	出家閒曠若虛空	自在無為離繫著
諦觀在家多過失	造諸罪業無有邊		
營生貪求恒不足	猶如大海難可滿	阿耨達池龍王等	四角涌出四大河
大中小河所有水	晝夜流注無暫歇	然彼大海未嘗滿	所貪舍宅亦如是
在家多起諸惡業	未嘗洗懺令滅除	空知愛念危脆身	不覺命隨朝露盡
琰魔使者相催逼	妻子屋宅無所隨	幽冥黑闇長夜中	獨往死門隨業受
諸佛出現起悲愍	欲令眾生厭世間	汝今已獲難得身	當勤精進勿放逸
在家屋宅深可厭	空寂寶舍難思議	永離病苦及憂惱	
諸有智者善觀察	當來淨信善男女	欲度父母及眷屬	令入無為甘露城
願求出家修妙道	漸漸修行成正覺	當轉無上大法輪	

復次，善男子！出家菩薩，觀世舍宅，猶如石火，深生厭患。

何以故？譬如微火，能燒一切諸草木等。

世間舍宅，亦復如是。貪心求覓，馳走四方。

若有所得，受用不足，於一切時，追求無厭。若無所得，心生熱惱，日夜追求。

是故，世間一切舍宅，能生無量煩惱之火。

為起貪心，恒無知足。世間財寶，猶如草木。貪欲之心，如世舍宅。

以是因緣，一切諸佛說於三界，名為「火宅」。

善男子！出家菩薩能作是觀，厭離世間，名真出家。

爾時，如來重說偈言：

出家菩薩觀世宅 猶如人間微少火 一切草木漸能燒 世宅當知亦如是

眾生所有眾財寶 更互追求常不足 求不得苦恒在心 老病死火無時滅

以是因緣諸世尊 說於三界為火宅

若欲超過三界苦 應修梵行作沙門 三昧神通得現前 自利利他悉圓滿

復次，善男子！愛樂出家，當觀舍宅，如彼深山石窟之中，有大寶藏。

譬如長者，唯有一子，其家大富，財寶無量，奴婢、僕從、象馬無數。
其父於後，忽遭重病，名醫良藥，不能救療。

長者自知將死不久，即命其子而告之言：「凡我所有一切財寶，付囑於汝，
勤加守護，勿令漏失。」

既付囑已，即便命終。

時，長者子，不順其命，恣行放逸，既損家業，財物散失。僮僕逃逝，而無
所依。

時，彼老母，心懷憂惱，遂得重病，即便終歿。其子貧窮，無所恃怙。

遂投山谷，拾薪採果，貨鬻自給。彼時遇雪，入石窟中，權自憩息。

然，此窟中，是昔國王藏七寶所，無能知者，經數百千年，迴絕人跡。

時，彼貧人，業因緣故，偶入窟中，見無量金，心大歡喜，得未曾有。因而
分割，若干分金造立舍宅，若干分金為娶妻財，如是奴婢、如是象馬，隨心所
欲，皆如其意。

作是計時，有諸群賊，為趁走鹿，到於窟前。見此貧人，以金分配。遂捨其

鹿，殺人取金。

愚癡凡夫，亦復如是，深著世樂，不樂出離。

深山石窟，如世舍宅。伏藏金寶，猶如善根。琰魔使者，即是群賊。隨業受報，墮三惡道。不聞父母三寶名字，喪失善根。

以是因緣，應當厭離，發於無上大菩提心，出家修道，希成妙覺。

爾時，如來重說偈言：

愛樂在家諸菩薩	觀於舍宅如寶藏		
譬如長者有一子	其家大富饒財寶	奴婢僕從及象馬	一切所須無不豐
於後長者身有病	舉世良醫皆拱手		
臨終告命諸親族	付囑家財與其子	教誨令存孝養心	當勤享祀無斷絕
是時其子違父命	廣縱愚癡多放逸	老母懷憂疾病身	又因惡子尋喪逝
眷屬乖離無所託			
拾薪貨鬻以為常	往彼山中遇風雪	入於石窟而暫息	窟中往昔藏妙寶
已經久遠無人知	樵人得遇真金藏	心懷踊躍生希有	尋時分配真金寶

隨意所欲悉用之 或以造舍或妻財 奴婢象馬並車乘 校計未來無能捨
群賊因鹿到其前 是彼怨家會遇時 遂殺貧人取金去
愚癡眾生亦如是 石窟猶如世間宅 伏藏真金比善根 琰魔鬼使如劫賊
以是因緣諸佛子 早趣出家修善品 應觀身命類浮泡 勤修戒忍波羅蜜
當詣七寶菩提樹 金剛座上證如如 常住不滅難思議 轉正法輪化群品

復次，善男子！世間所有一切舍宅，猶如雜毒甘味飲食。

譬如長者，唯有一子，聰慧利根，達迦樓羅祕密觀門，能辨毒藥善巧方便。
父母恩憐，愛念無比。

時，長者子，為有事緣，往至塵肆，未及歸家。

爾時，父母與諸親族歡喜宴樂，具設甘膳。

時，有怨家，密以毒藥，致飲食中，無人覺知。

是時，父母不知食中有雜毒藥，遂令長幼服雜毒食。

其子後來，父母歡喜，所留飲食，賜與其子。

是時，其子未須飲食，念迦樓羅祕密觀門，便知食中有雜毒藥。

其子雖知父母服毒，而不為說誤服毒藥。

所以者何？若覺服毒，更加悶亂，毒氣速發，必令人死。

即設方便，白父母言：「我且不食如是飲食，暫往市中，卻來當食。

何以故？我先買得無價寶珠，留在櫃中，而忘封閉。」

於是，父母聞說寶珠，生歡喜心，任子所往。

子遂馳走，詣醫王家，求阿伽陀解毒妙藥。既得此藥，疾走還家，乳酥沙糖三味合煎，和阿伽陀。

作是藥已，白父母言：惟願，父母！服是甘露，此是雪山阿伽陀藥。

所以者何？父母向來誤服毒藥。我所暫出，本為父母及諸人等，求得如是不死妙藥。

於是，父母及眾人等，心大歡喜，得未曾有。即服妙藥，吐諸毒氣，便得不死，更延壽命。

出家菩薩亦復如是，過去父母沉淪生死，現在父母不能出離。未來生死難可斷盡，現在煩惱難可伏除。

以是因緣，為度父母及諸眾生，激發同體大慈悲心，求大菩提，出家入道。
善男子！是名舍宅如雜毒藥入甘美食。

爾時，如來重說偈言：

世間所有諸舍宅	說名雜毒甘美食		
譬如長者有一子	聰明利智復多才	善迦樓羅祕密門	能辨毒藥巧方便
子有事緣往塵肆	暫時貨易未還家		
父母宴樂會諸親	百味珍饈皆具足	有一惡人持毒藥	密來致之於飲食
其子是時不在家	父母為兒留一分	舉家誤服雜毒藥	
子念觀門知有毒	即便奔馳到醫所	求得伽陀不死藥	三味和煎藥已成
遂白諸親令速服	如是所服如甘露	瘥諸雜毒皆安樂	
一切信心善男子	出家修道亦如是	為濟父母及眾生	所服煩惱諸毒藥
狂心顛倒造諸罪	永沉生死憂悲海		
割愛辭親入佛道	得近調御大醫王	所修無漏阿伽陀	還生父母三界宅
令服法藥斷三障	當證無上菩提果		

盡未來際常不滅 能度眾生作歸依 畢竟處於大涅槃 及佛菩提圓鏡智
復次，善男子！出家菩薩，常觀世間一切舍宅，猶如大風，不能暫住。
何以故？善男子！在家之心，恒起妄想，執著外境，不能了真。
無明昏醉，顛倒觸境，亦常不住。惡覺易起，善心難生。
由妄想緣，起諸煩惱。因眾煩惱，造善惡業。依善惡業，感五趣果。
如是。如是，生死不斷。

唯有正見，不顛倒心，作諸善業。因三善根及以信等，增長無漏法爾種子，
能起無漏三昧神通。

如是。如是，證聖相續。若伏妄想，修習正觀，一切煩惱永盡無餘。
爾時，智光長者白佛言：世尊！修習正觀，有無量門，修何等觀能伏妄想？
爾時，世尊告長者言：善男子！應當修習無相正觀。
無相觀者，能伏妄想。唯觀實性，不見十相。
一切諸法，體本空寂，無見無知，是名正觀。
若有佛子，安住正念，如是觀察。長時修習無相無為，妄想猛風寂然不動，

聖智現觀，證理圓成。

善男子！是名賢聖，是名菩薩，是名如來阿耨多羅三藐三菩提。

以是因緣，一切菩薩，為伏妄想，永不起故。為報四恩，成就四德。出家修學，息妄想心。經無量劫，成就佛道。

爾時，如來重說偈言：

出家菩薩觀在家	猶如暴風不暫住		
亦如妄執水中月	分別計度以為實	水中本來月影無	淨水為緣見本月
諸法緣生皆是假	凡愚妄計以為我	即此從緣法非真	妄想分別計為有
若能斷除於二執	當證無上大菩提		
凡情妄想如黑風	吹生死林念念起	四顛倒鬼常隨逐	令造五種無間因
三不善根現為纏	生死輪迴鎮相續		
若人聞經深信解	正見能除顛倒心	菩提種子念念生	大智神通三昧起
若能修習深妙觀	惑業苦果無由起		
唯觀實相真性如	能所俱亡離諸見	男女性相本來空	妄執隨緣生二相

如來永斷妄想因 真性本無男女相 菩提妙果證皆同 妄計凡夫生異相
三十二相本非相 了相非相為實相

若人出家修梵行 攝心寂靜處空閒 是為菩薩真淨心 不久當證菩提果
復次，善男子！出家菩薩，日夜恒觀世間舍宅，一切皆是煩惱生處。

何以故？如有一人，造立舍宅。以諸寶物，而自莊嚴。

造此宅已，而作是念：「今此舍宅，是我所有，不屬他人。唯我舍宅，最為吉祥。他人舍宅，所不能及。」

如是執著，能生煩惱。由煩惱故，我、我所執，而為根本，八萬四千諸塵勞門，更相競起，充滿宅中。

所以者何？在家凡夫，深著五欲。妻子眷屬、奴婢僕使，悉皆具足。以是因緣，生老病死憂悲苦惱、怨憎會、恩愛別離、貧窮諸衰、求不得苦，如是眾苦，如影隨形、如響應聲，世世相續，恒不斷絕。

如是眾苦，非無所因，大小煩惱而為根本。

一切財寶，追求而得。若無先因，不可追求。假使追求，亦無所獲。

善男子！以是義故，一切煩惱，追求為本。若滅追求，無量煩惱悉皆斷盡。
然，今，是身，眾苦所依。諸有智者，當生厭離。如過去世，迦葉如來為諸
禽獸而說偈言：

是身為苦本 餘苦為枝葉 若能斷苦本 眾苦悉皆除
汝等先世業 造罪心不悔 感得不可愛 雜類受苦身
若起殷重心 一念求懺悔 如火焚山澤 眾罪皆消滅
是身苦不淨 無我及無常 汝等咸應當 深生厭離心

爾時，無量諸禽獸等聞此偈已，於一念心至誠懺悔，便捨惡道，生第四天，
奉觀一生補處菩薩，聞不退法，究竟涅槃。

善男子！以是因緣，今此苦身，猶如舍宅。一切煩惱，即為宅主。
是故，淨信善男子等，發菩提心，出家入道，必得解脫一切眾苦，皆當成就
阿耨多羅三藐三菩提。

爾時，如來重說偈言：

出家菩薩恒觀察 舍宅所生諸煩惱

如有一人造舍宅	種種珍寶以嚴飾	自念壯麗無能比	不屬他人唯我有
工巧所修最殊妙	世間舍宅無能及	如是分別生執著	以我我所為根本
八萬四千諸煩惱	充滿舍宅以為災		
世間一切諸男女	六親眷屬皆圓滿	以是因緣生眾苦	所謂生老及病死
憂悲苦惱常隨逐	如影隨形不暫離	諸苦所因貪欲生	若斷追求盡諸苦
是身能為諸苦本	勤修厭離趣菩提	三界身心如舍宅	煩惱宅主居其中
汝等應發菩提心	捨離凡夫出三界		

復次，善男子！出家菩薩，常觀在家，（猶如長者生愚子）。

猶如大國，有一長者，其家豪富，財寶無量。

於多劫中，父子因緣，相襲不斷，修諸善行，名稱遠聞。

是大長者，所有財寶，皆分為四：

一分財寶，常求息利，以贍家業。

一分財寶，以充隨日供給所須。

一分財寶，惠施孤獨，以修當福。

一分財寶，拯濟宗親往來賓旅。

如是四分，曾無斷絕。父子相承，為世家業。

後有一子，愚癡弊惡，深著五欲，恣行放逸，違父母教，不依四業。

起諸舍宅，七層樓觀，倍於常制。眾寶嚴飾，琉璃為地。寶窗交映，龍首魚形，無不具足。微妙音樂，晝夜不絕。受五欲樂，如忉利天。

鬼神憎嫌，人天遠離。

於是，鄰家忽然火起，猛焰熾盛，隨風蔓延，焚燒庫藏，及諸樓臺。

時，長者子見是猛火，起大瞋心，速命妻子奴婢眷屬入於重舍，閉樓閣門。

以愚癡故，一時俱死。

在家凡夫，亦復如是。世間愚人，如長者子。諸佛如來，猶如長者。不順佛教，造作惡業，墮三惡道，受大苦惱。

以是因緣，出家菩薩，當觀在家，如長者子，不順父母，為火所燒，妻子俱死。

善男子等！應生厭離人天世樂，修清淨行，當證菩提。

爾時，如來重說偈言：

出家菩薩觀在家	猶如長者生愚子		
其家富有諸財寶	久遠相承無缺乏	先世家業傳子孫	一切資產為四分
常修勝行無過惡	名稱遍滿諸國土	金銀珍寶數無邊	出入息利遍他國
慈悲喜捨心無倦	惠施孤貧常不絕		
長者最後生一子	愚癡不孝無智慧	年齒已邁筋力衰	家財內外皆付子
子違父命行放逸	四業不紹墮於家	造立七層珍寶樓	用紺琉璃作窗牖
歌吹管絃曾不歇	常以不善師於心	受五欲樂如天宮	一切龍神皆遠離
鄰家欬然災火起	猛焰隨風難可禁	庫藏珍財及妻子	層樓舍宅悉焚燒
積惡招殃遂滅身	妻子眷屬同殞歿		
三世諸佛如長者	一切凡夫是愚子	不修正道起邪心	命終墮在諸惡趣
長劫獨受焚燒苦	如是展轉無盡期		
在家佛子汝當知	不貪世樂勤修證	厭世出家修梵行	山林寂靜離諸緣
為報四恩修勝德	當於三界為法王		

盡未來際度眾生 作不請友常說法 永截愛流超彼岸 住於清淨涅槃城
復次，善男子！出家菩薩，觀於世間，一切舍宅，猶如大夢。
譬如長者，有一童女，年始十五，端正殊妙。
爾時，父母處三層樓，將其愛女受諸歡樂。
於夜分中，母女同宿，在一寶床，而共安寢。
於是，童女夢見：「父母娉與夫家。經歷多年，遂生一子，端正殊妙，有聰
慧相。日漸恩養，能自行步，處在高樓。
因危墮落，未至於地，見有餓虎，接而食之。是時，童女倍復驚怖，舉聲號
哭。」
遂便夢覺。
爾時，父母問其女言：「以何因緣，忽然驚怖？」
時，女羞恥，不肯說之。其母慫慂，竊問其故。
時，女為母密說如上所夢之事。
善男子！世間生死有為舍宅，長處輪迴，未得真覺，爾所分位，恒處夢中，

生老病死三界舍宅。

如彼童女，處於夢中。虛妄分別亦復如是。

琰魔鬼使忽然而至，如彼餓虎，於虛空中接彼嬰孩而啖食之。

一切眾生，念念無常，老病死苦亦復如是。

誰有智者愛樂此身？

以是因緣，觀於生死長夜夢中，發菩提心，厭離世間，當得如來常住妙果。

爾時，如來重說偈言：

佛子至求無上道	當觀舍宅如夢中		
譬如富貴大長者	有一童女妙端嚴	隨其父母上高樓	觀視遊從甚歡樂
女向樓中作是夢	分明夢見適他人	後於夫家誕一子	其母愛念心憐愍
子上樓臺耽喜樂	因危墜墮於虎口	遂乃失聲從夢覺	方知夢想本非真
無明闇障如長夜	未成正覺如夢中	生死世間常不實	妄想分別亦如是
唯有四智大圓明	破闇稱為真妙覺	無常念念如餓虎	有為虛假難久停
宿鳥平旦各分飛	命盡別離亦如是	往來住業受諸報	父母恩情不相識

哀哉凡夫生死身 輪轉三塗長受苦

若知善惡隨業感 應當懺悔令消滅 一切人天妙樂果 慚愧正見為所因

應發堅固菩提心 被精進甲勤修學

復次，善男子！出家菩薩，觀於舍宅，如牝馬口海，出於猛焰，吞納四瀆，百川眾流，無不燒盡。

譬如往昔羅陀國中，有一菩薩，名妙得彼岸。然，是菩薩，有慈悲心，常懷饒益。

有諸商人，入海採寶。將是菩薩，同載船舶，皆達寶洲，度於嶮難，而無所礙，到於彼岸。

後時，菩薩年漸衰老，已經百歲，起坐扶策，力不能前。

有一商主，詣菩薩所，禮拜供養，白菩薩言：「我欲入海，求諸珍寶，永離貧窮，得大富貴。今請菩薩，與我同往。」

爾時，菩薩告商主言：「我今衰老，筋力微弱，不能入海。」

商主復言：「惟願，大士！不捨慈悲，哀受我請。於我舶中，但自安坐，是

我所願。」

爾時，菩薩受商人請，乘大舶船，入於大海，向東南隅，詣其寶所。

時遇北風，漂墮南海，猛風迅疾，晝夜不停。

經於七日，見大海水，變為金色，猶如鎔金。

爾時，眾商白菩薩言：「以何因緣，水變金色，有如是相？」

菩薩告言：「汝等！當知我今已入黃金大海。無量無邊紫磨真金充滿大海，金寶交映，有如是相。汝等既能超過正路，墮此海中。各自勤求，設諸方便，還歸北方。」

復經數日，見大海水，變為白色，猶如珂雪。

菩薩告言：「汝等！當知我今已入真珠大海。白玉真珠，充滿海中，珠映水色，有如是相。汝當盡力，設諸方便，還歸北方。」

復經數日，大海之水，變為青色，如青琉璃。

菩薩告言：「我及汝等，已入青玻瓈海，無量無邊青玻瓈寶，充滿大海。玻瓈之色，交映如是。」

復經數日，大海之水，變為紅色，猶如血現。

菩薩告言：「我及汝等，已入紅玻瓈海，無量無邊紅玻瓈寶，充滿大海。寶色紅赤，交映如是。」

復經數日，水變黑色，猶如墨汁。

遙聞猛火爆裂之聲，猶如大火燒乾竹林，熾然燄焮，甚可怖畏，如是相貌，曾未見聞。

又，見大火起於南方，猶如攢峰，高逾百丈，焰勢飛空，或合或散，光流掣電，如是之相，未曾見聞。

「我等身命，實難可保。」

於是，菩薩告眾人言：「汝等今者甚可怖畏。何以故？我等已入牝馬口海，諸四大海及四天下大小眾流，入北口海，皆被燒盡。所以者何？由諸眾生業增上力，自然天火，能燒海水。若是天火不燒海水，一日夜中，一切陸地，變成大海，所有眾生，悉皆漂沒。然，今我等遇大黑風，漂流如是牝馬口海。我今眾人，餘命無幾。」

爾時，船舶有千餘人，同時發聲，悲號啼哭。

或自拔髮，或自投身，作如是言：「我等今者，為求珍寶，入於大海，遇此險難。哀哉！苦哉！以何方便，得免是難？」

時，千人等，至誠歸命，或稱悲母，或稱慈父，或稱梵天，或稱摩醯首羅天王，或稱大力那羅延天。

或有歸命得岸菩薩，敬禮大士，而作是言：「惟願，菩薩！濟我等輩。」

爾時，菩薩為是眾人離諸恐怖，而說偈言：

世間最上大丈夫 雖入死門不生畏

汝若憂悲失智慧 應當一心設方便 若得善巧方便門 離諸八難超彼岸

是故安心勿憂懼 應當懇念大慈尊

於是，菩薩說此偈已，燒眾名香，禮拜供養十方諸佛。

發是願言：「南無十方諸佛！南無十方諸佛！諸大菩薩摩訶薩眾！四向四果一切賢聖！有天眼者、有天耳者、知他心者、眾自在者！我為眾生運大悲心，棄捨身命，濟諸苦難。然今我身，有一善根，受持如來不妄語戒，無量生中未

曾缺犯。若我一生有妄語者，今此惡風轉加增盛。如是，戒德非虛妄者，願以此善，迴施一切，我與眾生，當成佛道。若實不虛，願此惡風，應時休息。如意便風，隨念而至。然諸眾生，即是我身。眾生與我，等無差別。」

是大菩薩，發起如是同體大悲無礙願已。經一念頃，惡風尋止，使得順風，解脫眾難。

得至寶所，獲諸珍寶。

爾時，菩薩告商人言：「如是珍寶，難逢難遇。汝等先世，廣行檀施，得值如是眾妙珍寶。昔修施時，心有吝惜，以是因緣，遇是惡風。汝諸商人！所得珍寶，須知限量，無使多取，以縱貪心，後招大難。汝等！當知眾寶之中，命寶為最，若存其命。是無價寶。」

時。商人等蒙菩薩教，生知足心，不敢多取。

爾時，眾人得免災難，獲大珍寶，遠離貧窮，到於彼岸。

諸善男子！出家菩薩亦復如是。

親近諸佛善友知識，如彼商人，得遇菩薩。

永離生死，到於彼岸，猶如商主，獲大富貴。
世間所有有為舍宅，如牝馬口海能燒眾流。
出家菩薩亦復如是，審諦觀察在家過失。
汝，善男子！不染世間諸五欲樂，厭離三界生死苦難，得入清涼安樂大城。
爾時，如來重說偈言：

出家菩薩觀舍宅	如牝馬海燒眾流		
譬如往昔羅陀國	有一菩薩名得岸	具大福智巧方便	無緣慈悲攝有情
得是菩薩乘船舶	商人獲寶超彼岸	然是大士年衰老	不樂利他好禪寂
有一商主請菩薩	欲入大海求珍寶	惟願大士受我請	令我富饒無缺乏
於是菩薩運大悲	即便受請乘船舶	時張大帆遇順風	直往東南詣寶所
忽遇暴風吹船舶	漂墮南海迷所往		
經過七日大海水	悉皆變作黃金色	紫磨黃金滿海中	寶映光現真金色
復經數日大海水	變為白色如珂雪	真珠珍寶滿海中	所以海水成白色
又經數日大海水	變作紺青如琉璃	青玻瓈珠滿大海	所以水作紺青色

又經數日大海水	悉皆變作紅赤色	紅玻璃珠滿海中	故變水色同於彼
復經數日大海水	變為黑色如墨汁	如是天火所焚燒	海水盡皆如墨色
此海名為牝馬口	吞納四海及眾流	一切船舶若經過	有人到此多皆死
天火熾盛如山積	爆裂之聲如雷震	眾人遙見心驚怖	號叫搥胸白大師
於是菩薩起慈悲	不惜身命垂救護	暴風尋止順風起	渡於險難至寶所
各獲珍琦達彼岸	永離貧窮受安樂		
出家菩薩亦如是	親近諸佛如商主	永離火宅趣真覺	猶如商人歸本處
世間所有諸宅舍	如彼牝馬大口海		
出家常厭於在家	不染世間離五欲	樂住空閒心不動	善達甚深真妙理
或處人間聚落中	如蜂採花無所損	四威儀中恒利物	不貪世樂及名聞
口中常出柔軟音	粗鄙惡言斷相續	知恩報恩修善業	自他俱得入真常

爾時，智光及諸長者一萬人俱，異口同音，而白佛言：善哉，世尊！希有，善逝！如是。如是，世尊所說微妙第一，善巧方便饒益有情，如佛所說。

我今悉知，世間宅舍，猶如牢獄。一切惡法，從舍宅生。出家之人，實有無

量無邊勝利。由是我等，深樂出家，現在當來恒受法樂。

爾時，世尊告諸長者：善哉！善哉！汝等發心，樂欲出家。

若善男子善女人，發阿耨多羅三藐三菩提心。一日一夜，出家修道。二百萬劫，不墮惡趣。常生善處，受勝妙樂。遇善知識，永不退轉。得值諸佛，受菩提記，坐金剛座，成正覺道。

然，出家者，持戒最難。能持戒者，是真出家。

時，諸長者白佛言：世尊！我等持戒，修諸梵行。願我速出生死苦海，願我速入常樂寶宮，願我廣度一切眾生，願我疾證於無生智。

爾時，世尊告彌勒菩薩，及文殊師利：如是長者，付囑汝等，勸令出家，受持淨戒。

時，九千人於彌勒前出家修道，受持佛戒。七千人俱於文殊前出家修道，受佛禁戒。

如是人等，既得出家，成就法忍，入於如來祕密境界，不復退轉。

無量萬人，發菩提心，至不退轉位。無數人天，遠塵離垢，得法眼淨。

④ 無垢性品

爾時，智光及諸長者，既出家已，齊整法服，五輪著地，禮如來足，合掌恭敬。

白佛言：世尊！我等從佛聞所未聞，在家所有種種過失。發菩提心，厭離世間，剃除鬚髮，而作比丘。

惟願，如來。應。正等覺，為我等類及諸眾生，演說出家殊勝功德。令得聞者，發清淨心，樂遠離行，不斷佛種。

世尊大恩，無緣慈悲。憐愍眾生，如羅睺羅。

出家菩薩，應云何住？云何修習無垢之業？云何調伏有漏之心？

爾時，世尊讚歎智光諸比丘等：善哉！善哉！是真佛子！能為未來，一切眾生，問於如來如是大事。

如是。如是，如汝所說：「如來世尊憐愍眾生，平等無二，猶如一子。」

汝今諦聽，善思念之，吾當為汝分別演說。

出家菩薩，應如是住，如是修行無垢之業，如是調伏有漏之心。

唯然，世尊！願樂欲聞。

爾時，佛告智光比丘：出家菩薩，住如是心，常作是觀。

我得人身，諸根具足。從何處沒，來生此間？

我於三界中，當生何界？於四大洲，復生何處？六道之中，受生何道？

以何因緣，得離父母妻子眷屬，出家修道，免八難身？

莊嚴劫中，過去千佛，皆已涅槃。星宿劫中，未來千佛，未出於世。

賢劫之中，現在千佛。幾佛如來出現於世，化緣將盡，入般涅槃？幾佛世尊未出於世，是諸眾生根緣未熟，未聞正法？

復於何時，當來彌勒，從兜率天，下生人間，現成佛道？

於我身中，有何善業？戒定慧學，當有何德？

過去諸佛，皆已不遇。當來世尊，得見不耶？

我今現在諸凡夫地，三業煩惱，何最為重？

一生已來，造何罪業？於何佛所，曾種善根？

我此身命，能得幾時？

是日已過，命隨減少，猶如牽羊，詣彼屠所，漸漸近死，無所逃避，身壞命終，生於何處？

三惡道苦，如何脫免？

然，我此身，愛樂長養，念念衰老，無時暫停。誰有智者，愛樂此身？

智光！當知出家菩薩，常於晝夜，如是觀察。勿貪世間，受五欲樂。精勤修習，未嘗暫捨。如去頂石、如救頭燃，心常懺悔過去先罪。

安住如是四無垢性。

一心修行十二頭陀，調伏其心如旃陀羅。如是佛子，是名出家。

智光比丘！以何義故，說名「真實修沙門行，如旃陀羅。」？

其旃陀羅，每遊行時，手執錫杖，不敢當路。若人逼近，振錫令聞。

於大眾中，心行謙下，不敢輕慢。被呵責時，心無怨恨，未嘗加報。罵辱鞭撻，默然受之。

何以故？自知下性，不階眾流。

以是因緣，無瞋無報。

智光！當知出家菩薩，亦復如是。

剃除鬚髮，形同嬰兒。執持應器，依他活命。身著袈裟，如被甲冑。杖錫而行，如持鉏耒。執智慧劍，破煩惱賊。修嬰兒行，饒益一切。

是故，一切三毒利箭，不入真實沙門之身。

出家菩薩，以三觀門，修忍辱行，名真出家。

觀諸眾生，是佛化身。觀於自身，為實愚夫。

觀諸有情，作尊貴想。觀於自身，為僮僕想。

又，觀眾生，作父母想。觀自己身，如男女想。

出家菩薩，常作是觀。或被打罵，終不加報。善巧方便，調伏其心。

智光比丘！汝等諦聽！云何名為「四無垢性」？

衣服、臥具、飲食、湯藥，如是四事，隨有所得，粗細稱心，遠離貪求。是四無垢性。

諸比丘等！以何因緣，如是四行名無垢性？

智光！當知諸佛如來三十七品菩提分法，皆從此生。佛法僧寶，常不斷絕。

是故，得名為無垢性。

爾時，世尊而說偈言：

智光比丘汝諦聽	出家菩薩所應作	無緣大慈攝眾生	猶如一子皆平等
發菩提心求正覺	應作三種成佛法		
心常住四無垢性	當修十二頭陀行	下心猶如旃陀羅	
四威儀中作是念	十方無量諸菩薩	剎那剎那趣聖道	彼既修證我亦爾
如何流轉三界中	恒居生死無量苦	我今是身住何界	六道輪迴處何道
胎卵濕化受何生	身口意業於何修	所造罪中何者重	三性之心何心多
如是微細觀察已	大慈大悲恒相續	大喜大捨為先心	為有緣者說妙法
晝夜修心不暫停	如去頂石救頭燃	念三觀門常不離	
觀諸有情是佛身	唯我獨處於凡類	一切眾生等尊貴	我為僮僕居卑賤
世間眾生同父母	我如男女行孝養	被他打罵不瞋嫌	勤修忍辱無怨嫉
四事供養心不著	是則名為無垢性		
三十七品菩提分	及以如來果報身	如是殊勝無漏法	四無垢性為根本

不放逸行常修習 是名出家真佛子

菩提智種念念增 無漏聖道皆成就 速得超於無量劫 端坐花王法界中

福智二嚴皆圓滿 無邊劫海利群生 由無垢性皆成就 證獲如來常住果

復次，智光比丘！出家菩薩，於所著衣，不應貪著。若細若粗，隨其所得，但於施者，為生福田，勿嫌粗惡。

不得為衣，廣說法要，起諸方便，與貪相應。

世間凡夫，為衣服故，非法貪求，造不善業。

墮於惡道，經無量劫，不遇諸佛、不聞正法。

受苦畢已，復生人間，貧窮困苦，求不得苦，晝夜逼迫，衣不蔽形，食不支命。

如是眾苦，皆由先世，為衣服故，多殺生命，造種種罪。

出家菩薩，即不如是，隨其所得，不嫌粗惡。

但懷慚愧，以充法衣，得十勝利。

能覆其身，遠離羞恥，具足慚愧，修行善法。

遠離寒熱，及以蚊虻惡獸毒蟲，安隱修道。

示現沙門出家相貌，見者歡喜，遠離邪心。

袈裟即是人天寶幢之相，尊重敬禮，得生梵天。

著袈裟時，生寶塔想，能滅眾罪，生諸福德。

本制袈裟，染令壞色，離五欲想，不生貪愛。

袈裟是佛淨衣，永斷煩惱，作良田故。

身著袈裟，罪業消除。十善業道，念念增長。

袈裟猶如良田，能善增長菩薩道故。

袈裟猶如甲冑，煩惱毒箭，不能害故。

智光！當知：以是因緣，三世諸佛、緣覺、聲聞，清淨出家，身著袈裟，三聖同坐解脫寶床，執智慧劍，破煩惱魔，共入一味諸涅槃界。

爾時，世尊而說偈言：

智光比丘應善聽 大福田衣十勝利

世間衣服增欲染 如來法服不如是

法服能遮世羞恥	慚愧圓滿生福田	遠離寒暑及毒蟲	道心堅固得究竟
示現出家離貪欲	斷除五見正修持	瞻禮袈裟寶幢想	恭敬生於梵王福
佛子披衣生塔想	生福滅罪感人天	肅容致敬真沙門	所為不染諸塵俗
諸佛稱讚為良田	利樂群生此為最	袈裟神力不思議	能令修植菩提行
道芽增長如春苗	菩提妙果類秋實	堅固金剛真甲冑	煩惱毒箭不能害
我今略讚十勝利	歷劫廣說無有邊		
若有龍身披一縷	得脫金翅鳥王食	若人渡海持此衣	不怖龍魚諸鬼難
雷電霹靂天之怒	披袈裟者無恐畏	白衣若能親捧持	一切惡鬼無能近
若能發心求出家	厭離世間修佛道	十方魔宮皆振動	是人速證法王身

復次，智光菩薩！出家佛子，常行乞食，應捨身命，不斷是心。

所以者何？一切有情，皆依食住。是以乞食，利益無窮。

汝等！當知出家菩薩常行乞食，有十勝利。云何為十？

常行乞食，以自活命，出入自由，不屬他故。

行乞食時，先說妙法。令起善心，然後自食。

為不施人，發大悲心。為說正法，令起捨心而生勝福。
依佛教行，增長戒品，福德圓滿，智慧無窮。
常行乞食。於七九慢，自然消滅。眾所恭敬，是良福田。
於乞食時，當得如來無見頂相，應受世間廣大供養。
汝等佛子隨學此法，住持三寶，饒益有情。
於乞食時，不得為求食故，起希望心，讚歎一切男子女人。
行乞食時，須依次第，不應分別貧富之家。
常行乞食，諸佛歡喜，得一切智，最為良緣。
智光菩薩！我為汝等，略說如是十種利益。若廣分別，無量無邊。
汝等比丘及未來世，求佛道者，應如是學。
爾時，世尊而說偈言：

智光菩薩汝諦聽	出家大士應離貪	當發出世修行心	乞食頭陀為根本
凡夫住於有漏食	聖者悉依無漏食	有漏無漏諸聖凡	一切無不依食住
我為汝等諸佛子	開演出世二利行	三世如來所稱讚	乞食功德有十利

偏稱此行最為勝	出入自在無繫縛	先令施主發初心	令趣菩提然後食
為除慳貪說妙法	能起大捨無量心	依大師教行乞食	增長無量諸梵行
七九種慢自除滅	為諸人天所尊敬	如來頂相不可見	轉妙法輪化十方
盡未來際傳此法	令不斷絕三寶種	若為飲食起妄心	不應讚歎諸男女
起大慈悲平等意	不生分別貧與富	清淨乞食佛所讚	一切種智從此生
三世如來出于世	為諸眾生說四食	段觸思識為其四	皆是有漏世間食
唯有法喜禪悅食	乃是聖賢所食者	汝等厭離世間味	當求出世無漏食

復次，智光菩薩！出家佛子，於諸醫藥，不應貪著。

若有病時，他煎藥已。所棄捨藥，訶梨毘梨，及阿摩勒。取是等藥，即應服之。乃至一生，服所棄藥。於諸藥等，常生知足。

如是，名為真實沙門。

出家佛子，恒服棄藥，是人獲得十種勝利。云何為十？

為求藥草，不近他人。永息貪求，安住正念。

不淨觀門，易得成就。出世之心，能得堅固。

於諸珍味，恒不貪著。速證正智，餐禪悅食。

於諸世間一切財物，常能知足，早得解脫。

不近世間一切凡夫，親近出世清淨善友。

由不嫌惡諸棄藥等，於粗飲食，亦得解脫。

於所重藥，永不希望。一切世間，無不尊故。

速能調伏諸煩惱病，證得如來常住法身。

永斷三界一切煩惱，能療眾生身心重病。

能順佛教，修菩薩行，福智圓滿，得大菩提。

智光！當知：我為汝等略說棄藥十種勝利。如是妙行，去來現在出家菩薩，皆共修學。

汝等應當為諸眾生演說流布，無令斷絕。即為如來廣設供養。世間所有財敬供養，所不能及。於菩薩行，不復退轉，速證無上正等菩提。

爾時，世尊重說偈言：

智光比丘汝善聽 出家所服無垢藥

菩薩妙行此為先	眾生有病如己病		
以大悲恩救眾苦	復用慈心施安樂	最上妙藥與他人	
前人所棄而自服	菩薩不擇貴賤藥	但療眾病令安隱	取他所棄之餘藥
飲服以充治所疾	取他棄藥有十利	三世如來共稱讚	
雖求醫藥不近他	永息追求住正念	不淨觀門易成熟	而能遠作菩提因
不著甘味離諸貪	當求法喜禪悅食	於世財寶能知足	獲得無漏七聖財
捨彼凡愚不共住	親近聖賢為良友	由是不嫌眾棄藥	亦於飲食斷貪求
珍膳妙藥不希望	世間所以咸尊重	能療身心煩惱病	悟得真如法性身
永斷三界諸習氣	證得無上真解脫	能順佛教趣菩提	福智圓成報身果
汝等佛子皆修學	當坐金剛真道場。		

復次，智光！出家菩薩，遠離喧鬧，住阿蘭若，修攝其心。無量千歲，以求佛道。

三世如來，離諸喧鬧，寂然閒居，萬行增修，證菩提果。

緣覺、聲聞，一切賢聖，證得聖果，亦復如是。

其阿蘭若，有十種德，能令證得三菩提果。云何名為十種勝德？

- ①為得自在，住阿蘭若。四威儀中，不屬他故。
- ②離我我所，名阿蘭若。於樹下時，無執著故。
- ③於臥具等，無所愛著。由斯，當臥四無畏床。
- ④阿蘭若處，三毒微薄。離貪瞋癡所緣境故。
- ⑤樂阿蘭若，修遠離行。不求人天五欲樂故。
- ⑥能捨喧鬧，住閒寂處。修習佛道，不惜軀命。
- ⑦愛樂寂靜，離世言詞。棄捨凡愚，無散亂故。
- ⑧世出世間一切事業，易得成就，無障礙故。
- ⑨阿蘭若處，是三昧室，能得百千大三昧故。
- ⑩清淨如空，以為舍宅。心無障礙，得大智故。

智光！當知阿蘭若處有如是等無量功德。

以是因緣，出家佛子，誓捨身命，不離山林。

若為聽法、供養病人師僧父母，出阿蘭若，入聚落中，宜速還歸於蘭若處。

若有因緣未得歸者，應作是想：「今此聚落，猶如山林。所得財物，虛假如夢。若有所得，不應貪著。」

如是佛子，是摩訶薩。

爾時，世尊重說偈言：

智光汝等善諦聽	無煩惱人所住處	遠離喧鬧處寂靜	此是神仙所居處
三世菩薩求菩提	於蘭若中成正覺	緣覺聲聞諸聖眾	亦於此處證菩提
住阿蘭若獲十利	能令證得三乘果		
自在遊行如師子	四威儀中無繫縛	山林樹下聖所樂	無我我所名蘭若
衣服臥具無繫著	坐四無畏獅子座	離諸煩惱名蘭若	一切貪愛無所著
常居物外厭塵勞	不樂世間五欲樂	遠離憤鬧寂靜者	棄捨身命求佛道
能住寂靜無人聲	於諸散亂心不起	世出世間諸善業	心無障礙皆成就
由是蘭若為根本	能生百千諸三昧	以大空寂為虛室	行者身心無障礙
具足如是十勝利	是故眾聖常居止		
智光汝等諸佛子	若欲速成一切智	乃至夢中莫捨離	阿蘭若處菩提道

我滅度後發心者 而能住於蘭若處 不久當坐寶花王 證得法身常樂果
爾時，世尊說是法時，無量百千初發心者，於無上道，得不退轉。

時，智光等諸菩薩眾，得陀羅尼，具大神通。百萬人天，發菩提意，悟三解脫。

爾時，如來告諸大眾：若有淨信善男子善女人，得聞如是四無垢性，甚深法門，受持讀習，解說書寫。

如是人等，所生之處，遇善知識，修菩薩行，永不退轉，不為一切諸業煩惱之所擾亂。

而於現世，獲大福智，住持三寶，得自在力，紹繼佛種，使不斷絕。

命終必生知足天宮，奉觀彌勒，證不退位。龍花初會得聞正法，受菩提記，速成佛道。

若欲願生十方佛土，隨其所願而得往生，見佛聞法，究竟不退阿耨多羅三藐三菩提。

⑤ 阿蘭若品

爾時，會中有一菩薩摩訶薩，名常精進，承佛威神，即從座起，偏袒右肩，右膝著地，合掌恭敬。

而白佛言：世尊！如佛所說「阿蘭若處是菩提道場。若有發心求菩提者，不應捨離阿蘭若處。」

是阿蘭若中，有多眾生，虎豹、豺狼、毒蟲、惡獸，乃至飛鳥，及與獵師，不識如來、不聞正法、又不敬僧。此諸有情，無復善根，遠離解脫。

何故如來令修學人「住阿蘭若速得成佛」？

惟願，世尊！為諸眾生，分別解說，決疑令喜，發菩提心，使不退轉。

爾時，佛告常精進菩薩：善哉！善哉！善男子！汝以大慈，問於如來清淨解脫，饒益未來諸修行者，功德無量。

諦聽！諦聽！善思念之，吾今為汝分別演說阿蘭若處種種功德。

唯然，世尊！願樂欲聞。

爾時，佛告常精進菩薩：如汝所說「阿蘭若處，得成聖者。山林之中，多諸眾生，以何因緣，不得成佛？」是義不然。

所以者何？彼諸眾生，不識三寶，不知厭足，不識善惡。於山林中，雖有世間種種珍寶，而不能知伏藏之處。菩薩摩訶薩，即不如是。

善男子！菩薩能知：佛法僧寶，是出世寶。七珍伏藏，是世間寶，悉能辨其種種色相，知其所在，而不貪求，亦不樂見，何況取乎！

菩薩出家，發堅固心，不惜身命，捨離父母、六親眷屬，樂住山林。

常作是念：「假使三千大千世界，劫盡之時，七日並出，火災熾燃，焚燒萬物。日月星辰、妙高山王，及七金山鐵圍山等，時至皆散。

三界之頂，非非想天，八萬劫盡，還生下地。

轉輪聖王，千子圍遶，七寶眷屬，四洲咸伏，壽命報盡，須臾不停。

我今亦爾。假使壽年，滿一百歲。七寶具足，受諸快樂。琰魔使至，不免無常。」

作是思惟：「我今不如代其父母及諸眾生修菩薩行，當得金剛不壞之身，還來三界，救度父母。」

作是願已，住阿蘭若，為諸眾生，發弘誓願。

上根菩薩，發是願言：「願我未得成佛已來，常於露地，長坐不臥。」

中根菩薩，發是願言：「願我未得成佛已來，於樹葉中，常坐不臥。」

下根菩薩，發是願言：「願我未得成佛已來，於石室中，常坐不臥。」

如是三根出家菩薩，坐三種座。各作是念：「過去菩薩，坐於此座，而能證得陀羅尼門，功德自在。過現未來諸菩薩等，皆於此座得陀羅尼，修證自在。我亦如是，今坐此處，必當成就，於陀羅尼而得自在。若未成就得自在者，終不捨離阿蘭若處。」

或有菩薩，未得圓滿四無量心，終不捨離阿蘭若處。

或有菩薩，未得圓滿五通神力，終不捨離阿蘭若處。

或有菩薩，未得圓滿六波羅蜜，終不捨離阿蘭若處。

或有菩薩，未得圓滿善巧方便，終不捨離阿蘭若處。

或有菩薩，未能調伏一切有情，終不捨離阿蘭若處。

或有菩薩，未得圓滿四種攝法，終不捨離阿蘭若處。

或有菩薩，未能修習六念之法，終不捨離阿蘭若處。

或有菩薩，未能成就多聞智慧，終不捨離阿蘭若處。
或有菩薩，未能成就堅固信力，終不捨離阿蘭若處。
或有菩薩，未能斷除六十二見，終不捨離阿蘭若處。
或有菩薩，未能修習八種正道，終不捨離阿蘭若處。
或有菩薩，未能永斷二障習氣，終不捨離阿蘭若處。
或有菩薩，未能圓滿隨病與藥微妙智慧，終不捨離阿蘭若處。
或有菩薩，未能圓滿大菩提心，終不捨離阿蘭若處。
或有菩薩，未能圓滿恒沙三昧，終不捨離阿蘭若處。
或有菩薩，未能成就無量神通，終不捨離阿蘭若處。
或有菩薩，以定通力，見十八空，而心不驚。如是大事，若未成就，終不捨離阿蘭若處。
或有菩薩，未能圓滿一切智智，終不捨離阿蘭若處。
或有菩薩，未得圓滿一切種智，終不捨離阿蘭若處。
或有菩薩，未得修習三十七種菩提分法，終不捨離阿蘭若處。

或有菩薩，未得圓滿十地萬行，終不捨離阿蘭若處。

或有菩薩，於百劫中，未能修行相好之業，終不捨離阿蘭若處。

或有菩薩，未得圓滿如來四智，終不捨離阿蘭若處。

或有菩薩，未能圓滿證大涅槃，終不捨離阿蘭若處。

或有菩薩，坐金剛座，未能證得阿耨多羅三藐三菩提，常坐不起。

是名菩薩阿蘭若行。

善男子！出家菩薩，發菩提心，入於山林，坐三種座，鍊磨身心，經三大劫而修萬行，證得無上正等菩提。

爾時，世尊重說偈言：

昔諸如來因地時	住阿蘭若離塵處	伏斷煩惱所知障	超過三界證菩提
過去菩薩修行願	以阿蘭若為舍宅	阿僧祇劫修福智	十地究竟證三身
未來菩薩求佛果	入於深山修妙行	斷除二障生死因	當證三空真解脫
現在十方諸菩薩	修持萬行住空閒	不惜身命求菩提	念念證得無生智
若欲速證深三昧	因修妙定起神通	阿蘭若處心無諍	能變大地為七寶

若欲遊戲十方國	往來自在運神通	供養諸佛利群生	住阿蘭若無畏處
欲證有無如幻智	了達諸法本來空	住阿蘭若菩提場	令眾亦入真解脫
若欲速得如如智	證會諸法如如性	盡大劫海利群生	當住蘭若空寂處
若人欲得難思智	妙高山王納芥子	山王芥子不壞相	入於蘭若神通室
若人欲得無礙智	以一妙音演說法	隨類眾生各得解	當住蘭若修妙觀
若欲無生及無滅	應現十方諸國土	放光說法利群生	莫離蘭若空寂室
若以足指按大地	令十方界皆震動	睹相發心除邪見	當住蘭若觀自心
若欲諸佛出現時	最初獻於微妙供	檀波羅蜜皆圓滿	住阿蘭若修妙行
若人於佛涅槃時	最後供養成檀義	永斷貧窮及八難	誓願住於蘭若中
若欲福智皆圓滿	未來諸佛臨涅槃	受佛付囑廣弘宣	住阿蘭若修六念
若於諸佛涅槃後	結集遺法度眾生	助於諸佛讚真乘	住阿蘭若空寂舍
人天大師薄伽梵	難見難遇過優曇	若欲奉觀修供養	當住蘭若弘悲願
眾寶之尊法為最	成佛化利皆由此	如人欲得常聽法	住阿蘭若修梵行
始從今身至佛身	常願發心弘正教	乃至未得大菩提	念念不捨阿蘭若

若人欲報父母恩	代於父母發誓願	入阿蘭若菩提場	晝夜常修於妙道
若欲現世增福智	當來不墮八難中	如是有情發善心	住阿蘭若修悲願
三世菩薩求真覺	得道涅槃蘭若中	是故名為大道場	三乘聖眾皆同處
菩薩厭苦入山林	為度群生求聖道	自未成佛先度他	六道四生皆悲愍
上根菩薩居露地	中根菩薩居葉中	下根菩薩居石室	未成佛道常不臥
三世菩薩住蘭若	得陀羅尼自在力		
今我誓同菩薩心	未得總持恒止此	得大菩提在蘭若	入大圓寂由住處
菩薩起於金剛智	斷惑證真成妙覺	廣化眾生遊聚落	為求寂滅樂山林
萬行因滿果亦圓	盡未來時度群品		

爾時，世尊演說如是出家菩薩阿蘭若行。

無量菩薩，證極喜地。

恒河沙等無數菩薩，永離相用微細煩惱，證不動地。

不可說不可說菩薩摩訶薩斷一切障，入妙覺地。

無邊有情，發無等等阿耨多羅三藐三菩提心。

九萬七千眾生，遠塵離垢，得法眼淨。

⑥ 離世間品

爾時，會中有一菩薩摩訶薩，名樂遠離行，承佛威力，從坐而起。於大眾中為諸菩薩說阿蘭若行。

普告一切諸菩薩言：出家菩薩，住阿蘭若，應作是念：「以何因緣，遠離世間，修阿蘭若清淨妙行？」

諸佛子等！一心諦聽。我承佛力，今為汝等，分別演說阿蘭若行。

諸菩薩言：善哉！大士！為我等輩，及未來世求菩提者，惟願說之，我等樂聞。

是時，樂遠離行菩薩告諸大眾：一切世間，多諸恐怖。出家菩薩，為厭世間種種恐怖，捨離父母及諸眷屬，住阿蘭若，修遠離行。

云何名為種種恐怖？

或有菩薩，而作是念：「我，為恐怖。一切煩惱，從我生故。」

或有菩薩，而說：「我所，是為恐怖。一切煩惱，我所生故。」

或有菩薩，而說：「七慢，是為恐怖。起種種慢，不敬善人故。」

或有菩薩，以彼三毒，而為恐怖。造無量罪，墮惡道故。

或有菩薩，以彼五欲，而為恐怖。耽著世樂，墮八難故。

譬如世間，有七步蛇。若害人時，毒力熾盛。出過七步，即便命終。一蛇毒力，尚能損人，何況五蛇共為傷殺！毒力轉盛，命難得全。

世間五欲，亦復如是。一一欲樂，各能引起八萬四千微細塵勞。迷惑愚夫，令墮地獄餓鬼畜生，及餘難處，受大苦惱，何況具足貪著諸塵如恒河沙！

無數諸佛，出興於世，說法教化，隙光迅疾，終不得見。常在惡道，猶於自家。處無暇中，如戲園觀。

過去有佛，欲令眾生厭捨五欲，而說偈言：

譬如飛蛾見火光	以愛火故而競入	不知焰炷燒燃力	委命火中甘自焚
世間凡夫亦如是	貪愛好色而追求	不知色欲染著人	還被火燒來眾苦
譬如群鹿居林藪	食於豐草而自養	獵師假作母鹿聲	尋聲中箭皆致死
世間凡夫亦如是	貪著種種可意聲	不知聲能染著人	還受三塗諸苦報

譬如蜜蜂能飛遠	遊於春林採眾花	為愛醉象頰上香	象耳因之而掩死
世間凡夫亦如是	愛著一切受用香	不知香能染著心	生死輪迴長夜苦
譬如龍魚處於水	游泳沉浮而自樂	為貪芳餌遂吞鉤	愛味忘生皆致死
世間凡夫亦如是	舌根耽味以資身	殺他自活心不平	感得三塗極重苦
譬如白象居山澤	自在猶如獅子王	欲心醉亂處昏迷	追尋母象生貪染
一切凡夫亦如是	趣彼妙觸同狂象	恩愛纏綿不休息	死入地獄苦難量
世間男女互貪求	皆由樂著諸色欲	人天由此被纏縛	墮墜三塗黑闇中
若能捨離貪欲心	住阿蘭若修梵行	必得超於生死苦	速入無為常樂宮

或有菩薩，以貪多財，而為恐怖。

自己財寶，恒求積聚，而不受用，何況能施貧乏眾生！

於己財寶，深生貪著。於他財寶，欲令損減。

以是因緣，命終之後，墮大地獄，受無量苦。

如是苦報，名為第一正感之果。

從地獄出，受畜生身，身常勞苦，水草不足，經多時中，酬損他財。

如是眾苦，名為第二正感之果。

受是罪已，生餓鬼中，困飢渴苦，無量千劫不聞漿水飲食之名。其咽如針，其腹如山，縱得飲食，隨變為火。

如是苦身，名為第三正感之果。

畢是罪已，來生人間，貧窮下賤，為他所使。於諸財寶，所求難得。於一切時，而不自在。如是餘報，名相似果。

一切菩薩分明知見如是因果，常生恐怖，欲求解脫。由是恐怖，遠離眷屬，住阿蘭若。

或有菩薩，以渴愛心，而為恐怖。

於諸未得一切財寶，日夜追求，生渴愛故。

或有菩薩，我、我所見，而為恐怖。為諸煩惱，作依止故。

或有菩薩，以諸法見，而為恐怖。與所知障，作依止故。

或有菩薩，六十二見，而為恐怖。入邪見林，難出離故。

或有菩薩，疑，為恐怖。於真正法，生疑惑故。

或有菩薩，以彼斷見，而為恐怖。執無後世、撥無因果，生大邪見，入地獄故。

或有菩薩，以彼常見，而為恐怖。執五趣身，恒常決定，隨善惡業，無變易故。

或有菩薩，以彼嫉妒，而為恐怖。不耐他榮，懷惡心故。

或有菩薩，常以掉舉，而為恐怖。心不寂靜，生散亂故。

或有菩薩，以不信心，而為恐怖。如人無手，雖至寶山，終無所得。無信手者，雖遇三寶，無所得故。

或有菩薩，以彼無慚，而為恐怖。內無羞恥，常造諸惡。業障無明，難見佛故。

或有菩薩，以無愧心，而為恐怖。外無羞恥，棄恩背德。生死輪迴，墮三塗故。

或有菩薩，以忿恨等，而為恐怖。能損自他，互為怨結。於多劫中，障佛道故。

或有菩薩，以彼忘失，而為恐怖。於所聞法，不能憶持，忘失文義，增愚癡故。

或有菩薩，乃至一切不善黑業，而為恐怖。

何以故？一切不善，是生死因，輪轉三界，不得出離。

於是，無量無邊恐怖，皆能障礙出世勝法。

或有菩薩，以五種蓋，而為恐怖。五種煩惱，覆蓋菩薩菩提心故。

或有菩薩，以憎惡心，而為恐怖。於諸眾生，無憐愍心。修菩提行，多退轉故。

或有菩薩，以破戒垢，而為恐怖。污穢聖法，難得果故。

或有菩薩，以彼憂惱，而為恐怖。妄想熾然，失善業故。

或有菩薩，以惡作心，而為恐怖。於所修善，生追悔故。

或有菩薩，而說狂醉，是為恐怖。不識善惡，無尊卑故。

或有菩薩，以非時死，而為恐怖。不住正念，歸無常故。

或有菩薩，以妄語業，而為恐怖。生生世世，所有言說，一切眾生，不信受

故。

或有菩薩，以四顛倒，而為恐怖。由四顛倒，輪迴生死，起煩惱業，不求佛故。

或有菩薩，而說惡友，是為恐怖。隨不善友，造惡業故。

或有菩薩，以五蘊魔，而為恐怖。是五蘊身，從煩惱生。生已，即起無量煩惱。因諸煩惱，造不善業。由諸惑業，墮大深坑。以是因緣，而生恐怖。

或有菩薩，以煩惱魔，而為恐怖。大小煩惱，能續生死，退菩提心，墮惡道故。

或有菩薩，厭患死魔，而為恐怖。發菩提心，未得不退。身壞命終，生退轉故。

或有菩薩，以諸天魔，而為恐怖。天魔眷屬，充滿欲界，障修道人，退菩提故。

或有菩薩，以無記心，而為恐怖。於諸善法，不能進修。空過長時，退善業故。

或有菩薩，以彼八難，而為恐怖。墮八難者，從冥入冥，生死長夜，難遇明故。

或有菩薩，觀彼地獄，而為恐怖。一墮地獄，經無量劫，受大苦惱，難解脫故。

或有菩薩，觀畜生道，而為恐怖。傍生界中，受愚癡報，經無量劫，難出離故。

或有菩薩，觀餓鬼道，而為恐怖。於恒沙劫受飢渴苦，難可值遇佛法僧故。

或有菩薩，想欲界生，而為恐怖。煩惱雜起，造諸惡業，墮三塗故。

或有菩薩，以彼色界，而為恐怖。有覆煩惱，能障定故。

或有菩薩，以無色界，而為恐怖。三界之中，最為寂靜，猶如涅槃，有情妄執而為究竟，劫盡命終，墮地獄故。

或有菩薩，數數生死，而為恐怖。生邪見家，難出離故。

或有菩薩，厭離生死，而為恐怖。死此生彼，常受苦惱。障菩薩行，求涅槃故。

或有菩薩，以世間語，是為恐怖。心常散亂，妨善業故。
或有菩薩，以心意識，而為恐怖。所緣行相，不可知故。
若在俗家，由斯恐怖，晝夜相續，擾亂善心，不能證得無恐怖法。
過去菩薩，住阿蘭若，皆能證得無恐怖法，即是阿耨多羅三藐三菩提。
未來菩薩，住阿蘭若，悉皆當得無恐怖法阿耨多羅三藐三菩提。
現在十方諸大菩薩，住阿蘭若，斷一切障，得無恐怖阿耨多羅三藐三菩提。
汝等！當知隨應修學。三世菩薩，攝念身心，住阿蘭若，調伏妄想，永無恐怖，究竟阿耨多羅三藐三菩提。

復次，出家菩薩住阿蘭若，當作何業？作何等念？

日夜常作如是思惟：「世間所有一切恐怖，皆從『我』生。」

一切恐怖，著『我』生故。

一切恐怖，『我』為根本故。

一切恐怖，我愛生故。

一切恐怖，我想生故。

一切恐怖，我見生故。

一切恐怖，『我』為住處。

一切恐怖，因『我』生故。

一切恐怖，分別生故。

一切恐怖，煩惱生故。

一切煩惱，我愛生故。

若我住在阿蘭若處，不能捨離我、我所執，不應住是阿蘭若中，不如還住白衣屋舍。

何以故？

若有我想，不應住止阿蘭若處。

若有補特伽羅想者，不應住止阿蘭若處。

若人具有我、我所執，不應住止阿蘭若處。

若有法見，不應住止阿蘭若處。

若有具此四顛倒執，不應住止阿蘭若處。

汝等諦聽！若有修行作涅槃相，不應住止阿蘭若處，何況更起諸煩惱相！

汝等諦聽！若有不著一切法相，應當安住阿蘭若處，是名當坐無著道場，一切諸法皆不可得。

若心調柔，無有諍論，應當安住阿蘭若處。

於世因緣，都無所著，應當安住阿蘭若處。

於色聲香味觸等法，無依止者，應當安住阿蘭若處。

於一切法，有平等見，應當安住阿蘭若處。

於四威儀，能調自心，應當安住阿蘭若處。

能捨一切諸恐怖者，應當安住阿蘭若處。

諸佛子等！以要言之，於諸煩惱得解脫者，應當安住阿蘭若處。

若得成就涅槃因者，應當安住阿蘭若處。

能善修行四無垢性，應當安住阿蘭若處。

若有少欲能知足者，應當安住阿蘭若處。

具足多聞有智慧者，應當安住阿蘭若處。

若能修行三解脫者，應當安住阿蘭若處。

永斷能縛煩惱結者，應當安住阿蘭若處。

能審觀察十二因緣，應當安住阿蘭若處。

所作已辦者，應當安住阿蘭若處。

捨諸重擔者，應當安住阿蘭若處。

證悟真如深妙理者，應當安住阿蘭若處。

汝等！當知阿蘭若處，種種藥草，大小樹木，生阿蘭若，曾無恐怖，亦無分別。

菩薩摩訶薩，住阿蘭若，亦復如是。

觀自身心，猶如枯樹、牆壁瓦礫，等無有異。於一切法，無有分別。

我觀身心，猶如幻夢，中無有實，念念衰老。

其息出已，更不復入。由善惡因，隨業受報。

是身無常，速起速滅。是身虛假，終不久停。

如是，身中，無我我所，無有情，無命者，無養育者，無士夫者，無補特伽

羅者，無作業者，無有見者。如是等相，本來空寂，猶如虛空，亦如泡沫。

常應念念作如是觀，一切恐怖，皆得解脫。如彼樹木，無有恐怖。

時，諸菩薩得大安樂無畏生處，是名菩薩住阿蘭若求阿耨多羅三藐三菩提。

復次，出家菩薩，住阿蘭若，晝夜相續，應如是觀：

是阿蘭若，善能修習四無垢性安樂之處。

是阿蘭若，善能修習知足之處。

是阿蘭若，於諸煩惱得解脫處。

是阿蘭若，具足多聞智慧之處。

是阿蘭若，伏斷煩惱所知障處。

是阿蘭若，能入三種解脫門處。

是阿蘭若，善能證得八解脫處。

是阿蘭若，善能觀察十二緣處。

是阿蘭若，善能斷除業障之處。

是阿蘭若，能得初果預流之處。

是阿蘭若，能得第二一來果處。
是阿蘭若，能得第三不還果處。
是阿蘭若，得第四果阿羅漢處。
是阿蘭若，證得辟支佛果之處。
是阿蘭若，已辦所作，得自在處。
是阿蘭若，捨諸重擔，得輕安處。
是阿蘭若，證得二空真如之處。
是阿蘭若，能修證無量大慈心處。
是阿蘭若，修證無量大悲心處。
是阿蘭若，能善修習喜無量處。
是阿蘭若，善能修習捨無量處。
是阿蘭若，能發菩提心處。
是阿蘭若，菩薩修持到十信處。
是阿蘭若，復次進修到十住處。

是阿蘭若，展轉增修到十行處。
是阿蘭若，展轉修行十迴向處。
是阿蘭若，善能修習四善根處。
是阿蘭若，修行六度波羅蜜處。
是阿蘭若，修行初地至十地處。
是阿蘭若，證得六根清淨之處。
是阿蘭若，善能證得天眼通處。
是阿蘭若，得天耳通及宿住智、生死智、明神境、他心如是通處。
是阿蘭若，有慚愧處。
是阿蘭若，不放逸處。
是阿蘭若，修五根處。
是阿蘭若，證得無量無邊三昧之處。
是阿蘭若，能得恒沙陀羅尼門證自在處。
是阿蘭若，悟無生忍。

是阿蘭若，永出三界斷生死處。

是阿蘭若，得不退轉。

是阿蘭若，降伏一切眾魔怨敵，消除業障，見佛聞法，如是之處。

是阿蘭若，得佛不共最上法門。

是阿蘭若，修習戒蘊清淨之處。

是阿蘭若，出生無漏三摩地處。

是阿蘭若，能生般若證解脫處。

是阿蘭若，能生解脫知見之處。

是阿蘭若，得三十七菩提分法。

是阿蘭若，善能修攝十二頭陀。

是阿蘭若，智能分別諦理住處。

是阿蘭若，永離有漏五蘊生處。

是阿蘭若，能得解脫十二入處。

是阿蘭若，永離有漏十八界處。

是阿蘭若，微妙觀察十八空處。
是阿蘭若，容受一切諸法空處。
是阿蘭若，增長十善法生之處。
是阿蘭若，增長堅固菩提心處。
是阿蘭若，三世諸佛讚歎之處。
是阿蘭若，一切菩薩恭敬讚歎如是之處。
是阿蘭若，毘婆尸佛於尼俱陀樹下成道。
是阿蘭若，尸棄如來於尸利沙樹下成道。
是阿蘭若，毘舍如來阿尸婆多樹下成道。
是阿蘭若，俱留孫佛無憂樹下成等正覺。
是阿蘭若，俱那含牟尼如來優曇樹下成等正覺。
是阿蘭若，迦葉如來娑陀樹下成等正覺。
是阿蘭若，釋迦如來於畢鉢羅樹下成道之處。
汝等！當知：阿蘭若處，有如是等無量無邊功德勝利。

爾時，樂遠離行菩薩，為諸大眾，而說偈言：

出家菩薩住蘭若	當作何念及何業		
世間所有諸恐怖	皆從我見我所生	若能斷除我我所	一切恐怖無所依
若有能執我見心	畢竟不成菩提道	涅槃常住皆無相	何況煩惱非法相
不著諸法及眾生	心無諍論修正念	四威儀中調伏心	應住蘭若常寂靜
能斷煩惱心知足	住於蘭若空寂舍		
入三解脫無相門	住於蘭若離塵垢	能觀十二因緣法	四諦二空真妙理
世間八法不傾動	如是大士住蘭若		
能觀自身如枯木	亦如水沫及幻夢	不著二邊平等相	如是薩埵住蘭若
罪業纏縛無常身	本來虛假元無實	我法二執及罪相	於三世中不可得
自身他身無有二	一切諸法亦如是	諦觀法性無去來	如是菩薩住蘭若
梅檀塗身及讚歎	以刀屠割並罵辱	於此二人無愛憎	如是菩薩住蘭若
出家樂住阿蘭若	晝夜應作如是觀		
阿蘭若處真道場	一切如來成正覺	阿蘭若處妙法空	出世正法之所生

阿蘭若處聖所尊	能生三乘聖道故	阿蘭若處聖所宅	一切聖賢常住故
阿蘭若處如來宮	十方諸佛所依故	阿蘭若處金剛座	三世諸佛得道故
阿蘭若處涅槃宮	三世如來圓寂故		
阿蘭若處大慈室	菩薩住此修慈故	阿蘭若處是悲田	三世諸佛修悲故
阿蘭若處六通室	菩薩於此遊戲故	阿蘭若處大無畏	能斷一切恐怖故
阿蘭若處三摩地	諸求道者得定故	阿蘭若處陀羅尼	諸持咒人神力故
阿蘭若處善法堂	增長一切善法故	阿蘭若處菩提室	菩薩修道得忍故
若欲永超三界苦	菩提涅槃當修證	遍周法界利群生	應居蘭若菩提室
所修六度四攝法	迴施三有及四恩	自他俱入甘露城	同證一如真法界

爾時，樂遠離行菩薩摩訶薩，為諸大眾，說是法已。

佛言：善哉！善哉！善男子！汝為大眾，及未來世求佛道者，分別演說阿蘭若處殊勝功德，利益安樂現在未來一切眾生，趣向菩提正真覺道。汝所成就無量功德，千佛共說，不能窮盡。

K04 海眾獲益

爾時，會中，智光菩薩、無量阿僧祇菩薩大眾，聞「阿蘭若最勝功德」，即得聞持陀羅尼門。

無量眾生發無等等阿耨多羅三藐三菩提心，得不退轉。

千億眾生遠塵離垢，得法眼淨。

⑦ 厭身品

爾時，彌勒菩薩摩訶薩，即從座起，偏袒右肩，右膝著地，合掌恭敬。

而白佛言：世尊！我等既悟「出家菩薩摩訶薩，厭離世間，住阿蘭若，調伏其心，修無垢行。」然，此菩薩住空閒處，自於是身，應作何觀？

爾時，佛告彌勒菩薩言：善哉！善哉！善男子！汝為眾生，起大悲心，請問如來「入聖智觀妙行法門」。汝當善聽，今為汝說。

唯然，世尊！願樂欲聞。

善男子！出家菩薩，住阿蘭若，求阿耨多羅三藐三菩提時，四威儀中，微細觀察：「是有漏身，三十七種不淨穢惡，是不可愛、是不堅牢。」

當觀此身，猶如坯器。

外以雜彩金銀七寶，巧飾莊嚴。內以糞穢種種不淨，填塞充滿。兩肩擔負，隨途而行。其有見者，皆生愛樂，不知器中盛滿不淨。

有六黑蛇，常在此器。一蛇隨動，器即破壞。毒害臭惡，竟無所堪。

世間之人莊嚴其身，如彼彩畫盛不淨器。貪瞋癡三，名為心病。風黃痰癰，名為身病。內外六病，能害身心。如彼六蛇居於器內，一一蛇動，器即破壞。一一病發，身即無常。

善男子！出家菩薩，處於空閒，觀察是身，名為第一不淨觀相。

出家菩薩，於日夜中，又觀自身，臭穢不淨，猶如死狗。

何以故？彼身，亦是父母不淨為生緣故。

出家菩薩，又觀自身，如蟻子臺，安住眾蟻。

時，有白象，來至臺邊，以身觸臺，臺即崩碎。

善男子！此臺，所謂五蘊之身。白象，是為琰魔羅使。

身歸後世，如象壞臺。

出家菩薩，又觀自身。而作是念：「我今此身，從頂至足，皮肉骨髓，共相

和合，以成其身。猶如芭蕉，中無實故。」

出家菩薩，又觀自身，無有強力。

皮肉薄覆，如塗附牆。億萬毛髮，如草生地。微細風大，出入毛孔。誰有智者，當樂此身？剎那剎那，衰敗轉故。

出家菩薩，又觀自身，如養毒蛇，而取其害。

我今，雖以飲食衣服資長是身，而不識恩，畢竟還令墮於惡道。

出家菩薩，又觀自身，譬如怨家詐作親友，伺求其便，而將毒藥斷彼命根。

我身如是，本非真實，終致無常，非聖愛故。

出家菩薩，又觀自身，如水上泡。

雖復妙好琉璃珠色，剎那因緣，起滅無恒有為，念念不久住故。

出家菩薩，又觀自身，如乾闥婆城。

雖現相狀，而不實有。今者，我身亦復如是。

出家菩薩，又觀自身，猶如影像。

我身亦爾，雖有非真。

出家菩薩，又觀自身，譬如外國強盛怨敵。

今者，我身亦復如是，煩惱怨敵侵掠善根。

出家菩薩，又觀自身，如朽舍宅。

雖加修葺，當必崩壞。我身亦爾，雖加愛念，當必無常。

出家菩薩，又觀自身，如近怨國，城邑人民，常懷恐怖。

今者，我身亦復如是，於念念中，畏無常怨。

出家菩薩，又觀自身，如無量薪，為火燒熱。

然，是猛火，曾無厭足。我身亦爾，以貪愛火燒五欲薪，其心增長，亦復如是。

出家菩薩，又觀自身，如新生子。慈母憐愍，恒加守護。

我身亦爾，若不守護，病之身心，即便不能有所修證。

出家菩薩，又觀自身，本性不淨。

譬如有人，厭患炭色，設諸方便，以水洗之。經無量時，黑色仍舊，乃至炭盡，終無所益。

我身亦爾，有漏不淨，假使海水，盡未來際，洗之無益，亦復如是。
出家菩薩，又觀自身，如油沃薪，以火焚燒。又遇大風，勢不可止。
是身亦爾，名五蘊薪，沃貪愛油，縱瞋恚火，愚癡風力，無有休息。
出家菩薩，觀於自身，猶如惡疾。四百四病所住處故。
亦如大腸，八萬四千蟲所住故。
是無常處，出息不還，即無常故。
亦如非情，神識易脫，同瓦石故。
亦如河水，剎那前後，不暫住故。
亦如壓油，於一切事，受勞苦故。
無所依者，猶如嬰兒，失父母故。
無救護者，猶如蝦蟆，蛇所吞故。
如穴無底，心心所法，不可知故。
恒不知足，於五欲樂，心無厭故。
恒不自在，斷常二見，所繫縛故。

不生慚愧，雖蒙眷屬養育，棄捨生故。

亦如死屍，於日夜分，近滅壞故。

唯受諸苦，於一切處，無真樂故。

為苦所依，一切眾苦，依身住故。

如空聚落，於是身中，無主宰故。

畢竟空寂，遍計所執，妄構畫故。

如谷中響，皆是虛妄所顯現故。

亦如船舶，若無船師，即漂沒故。

亦如大車，運載財寶。何以故？乘於大乘，到菩提故。

善男子！出家菩薩，日夜觀察，非不愛惜如是之身，欲令眾生出生死海到彼岸故。

爾時，世尊說是法已，告彌勒菩薩摩訶薩言：善男子！修如是行，此則名為出家佛子所觀法要。

若有佛子，發菩提心，為求阿耨多羅三藐三菩提，住阿蘭若，修習如是三十

七觀，亦教他修如是法要，解說、書寫、受持、讀習，遠離一切我我所執，永斷貪著五欲世樂。

速能成就不壞信心，求大菩提，不惜軀命，何況世間所有珍寶！現身必得究竟成滿一切如來金剛智印，於無上道永不退轉，六度萬行速得圓滿，疾成阿耨多羅三藐三菩提。

爾時，會中八萬四千新發意菩薩深厭世間，得大忍力，不復退轉於無上道。

百千婆羅門發菩提心，成熟信根，得不退轉。

三萬六千善男子善女人，遠離塵垢，得法眼淨。

⑧ 波羅蜜多品

爾時，彌勒菩薩摩訶薩白佛言：

世尊！以何因緣，殷勤稱讚「住阿蘭若修菩薩行」，而不稱讚「住於餘處修菩薩行」？

如來一時，在靈鷲山，為諸菩薩，廣說法要。而作是言：「菩薩或時，止姪女家、親近屠者。示教利喜，無數方便，饒益眾生，為說妙法，令入佛道。」

世尊，今日，為新發意所說妙法，而不如是。

然，我等類，親於佛前，得聞深法，無有疑惑。

惟願，如來！為未來世，求佛道者，演說甚深微妙真理，令菩薩行，無復退轉。

爾時，佛告彌勒菩薩摩訶薩：善男子！發阿耨多羅三藐三菩提心求菩提道，有二菩薩：一者在家，二者出家。

在家菩薩，為欲化導婬室、屠肆，皆得親近。出家菩薩，則不如是。

然，此菩薩，各有九品。上根三品，皆住阿蘭若，無間精進，利益有情。中下二根諸菩薩等，隨宜所住，方處不定，或住阿蘭若，或居聚落，隨緣利益，安隱眾生。

如是行門，汝應觀察。

復次，善男子！出家菩薩，修習佛道，已得無漏真實之法，隨緣利樂一切有情。

若有佛子，未得真智，住於阿蘭若，要當親近諸佛菩薩。

若有值遇真善知識，於菩薩行，必不退轉。以是因緣，諸佛子等！應當至心求見一佛及一菩薩。

善男子！如是，名為出世法要，汝等咸當一心修學。

復次，善男子！出家菩薩，厭離世間，住阿蘭若，省用功力，得圓滿八萬四千波羅蜜行，速證阿耨多羅三藐三菩提。

所以者何？若捨名利，住山林者，於身命財，必無吝惜，永無繫屬，自然易滿三種波羅蜜多。

彌勒菩薩白佛言：世尊！住阿蘭若出家菩薩，不蓄財寶。以何因緣，能得圓滿檀波羅蜜？

佛告彌勒菩薩摩訶薩：善男子！住阿蘭若出家菩薩，入於聚落，所乞之食，先以少分施於眾生，又以餘分施於所欲。即得名為檀波羅蜜。

以自身命供養三寶，頭目髓腦施來求者。即得名為親近波羅蜜。

為求法者說出世法，令發無上菩提心故。即得名為真實波羅蜜。

善男子！是名出家菩薩成就布施波羅蜜多。

復次，善男子！出家菩薩，住阿蘭若故，修十二頭陀之行。若行步時，看二肘地，不損眾生。即得名為持戒波羅蜜。

堅持禁戒，不惜軀命。即得名為親近波羅蜜。

為求出世，說法教化，令發無上菩提之心。即得名為真實波羅蜜。

善男子！是名出家菩薩成就持戒波羅蜜多。

復次，善男子！出家菩薩，住阿蘭若，能滅瞋恚，得慈心三昧，亦無毀辱一切眾生。即得名為忍辱波羅蜜。

若為一人，說一句法，令發阿耨多羅三藐三菩提心。即得名為真實波羅蜜。

善男子！是名出家菩薩成就忍辱波羅蜜多。

復次，善男子！出家菩薩，為令眾生得成佛故，修精進行。未得成佛，福智羸弱，不貪安樂，不造眾罪。於昔菩薩行苦行中，深生歡喜，翹敬宗仰，常無休息。以是因緣，即得名為精進波羅蜜。

棄捨身命，如捐涕唾，一切時中，未嘗懈怠。即得名為親近波羅蜜。

遇有緣者，說最上道，令趣無上正等菩提。即得名為真實波羅蜜。

由精進心，如是十行，過去不退、現在堅固、未來速滿。

善男子！是名出家菩薩摩訶薩成就精進波羅蜜多。

復次，善男子！出家菩薩，住阿蘭若。修習三昧，為攝善法，令不散失，入諸解脫，永斷邊見。現於神通，化彼眾生，令得正智，斷煩惱本，入真法界，悟如實道，當趣菩提。以是因緣，即得名為禪定波羅蜜。

欲令眾生，如我無異，悉得滿足，調伏有情，不捨三昧，不惜身命。修此三昧，即得名為親近波羅蜜。

為諸眾生，說深妙法，皆令趣向無上菩提。即得名為真實波羅蜜。

善男子！是名出家菩薩成就禪定波羅蜜多。

復次，善男子！出家菩薩，處於空閒，親近供養諸佛菩薩、一切智者。常樂聽聞甚深妙法，心生渴仰，恒無厭足。善能分別二諦真理，斷除二障、通達五明。說諸法要，能決眾疑。以是因緣，即得名為般若波羅蜜。

為求半偈，棄捨身命，不憚眾苦，志求菩提。即得成就親近波羅蜜。

於大會中，為人說法，於深妙義，無所祕惜，能令發起大菩提心，於菩薩行

得不退轉。常能觀察我身、阿蘭若，及菩提心、真實法身，如是四種，無有差別。如是。如是，觀妙理故，即得名為真實波羅蜜。

善男子！是名出家菩薩成就般若波羅蜜多。

復次，善男子！出家菩薩，住空閒處，常能修習方便勝智波羅蜜多。以他心智，能了有情意樂煩惱，心行差別，應病與藥，悉令除瘥。自在遊戲，神通三昧，發大悲願，成熟眾生。諸佛之法，無不通達。以是因緣，即得名為方便善巧波羅蜜多。

為欲饒益諸眾生故，於身命財，都不固惜。即得名為親近波羅蜜多。

為諸眾生，怨親平等，說微妙法，令入佛智。即得名為真實波羅蜜多。

善男子！是名出家菩薩成就方便善巧波羅蜜多。

復次，善男子！出家菩薩，入於山林，為諸眾生，常能修習願波羅蜜。

心恒觀察諸法真性，非有、非空，中道妙理。於世俗事，悉能辨了。為化有情，恒修慈悲。以是因緣，即得名為願波羅蜜。

以四弘願，攝受眾生，乃至捨身，不壞悲願。即得名為親近波羅蜜。

說微妙法，辯才無礙，若有聽聞，畢竟不退。即得名為真實波羅蜜。

善男子！是名出家菩薩成就願波羅蜜多。

復次，善男子！出家菩薩，住阿蘭若。以正智力，善了有情心行黑白，能為眾生說相應法，令入大乘甚深妙義，即能安住究竟涅槃。以是因緣，即得名為力波羅蜜。

以正智眼照見五蘊空寂之理，能捨身命，利眾生故。即得名為親近波羅蜜。

以妙智力，化邪見眾，令斷輪迴生死惡業，趣向常樂究竟涅槃。即得名為真實波羅蜜。

善男子！是名出家菩薩成就力波羅蜜多。

復次，善男子！出家菩薩，住阿蘭若。於一切法，了知善惡，遠離邪見，攝受正法，不厭生死，不樂涅槃。即得名為智波羅蜜。

不愛自身，憐愍眾生，於身命財，恒修大捨。即得名為親近波羅蜜。

以微妙智，為諸眾生說一乘法，令入阿耨多羅三藐三菩提。以是因緣，即得名為真實波羅蜜。

善男子！是名出家菩薩成就智波羅蜜多。

善男子！此如是等波羅蜜多，以何義故，說為八萬四千差別？

汝等！當知：為多貪者，分別演說二千一百波羅蜜多。為多瞋者，分別演說二千一百波羅蜜多。為多癡者，分別演說二千一百波羅蜜多。為等分者，分別演說二千一百波羅蜜多。

善男子！於如是等二千一百波羅蜜多，以為根本，轉增十倍，遂成八萬四千波羅蜜多。

如是等法，皆利他行。

善男子！若有眾生，其性難調，聞是法已，心未調伏，即為宣說八萬四千諸三昧門。如是妙法，皆自利行。

若有眾生，其性難調，聞是法已，心未調伏，即為宣說八萬四千陀羅尼門。如是妙法，皆利他行。

善男子！我為調伏一切有情，說如是法，及以無數善巧方便，現種種相，教化眾生。善男子！以是義故，一切人天，普稱如來名為「導師」。

善男子！未來現在諸佛世尊，悉皆修習八萬四千波羅蜜門、八萬四千諸三昧門、八萬四千陀羅尼門，永斷八萬四千微煩惱障，八萬四千微所知障。

皆詣阿蘭若菩提樹王，坐金剛座，入金剛定，降伏一切天魔怨已，證得阿耨多羅三藐三菩提。

爾時，世尊欲重宣此義，而說偈言：

超過三界大法王	出現世間化群品	恒河沙等諸菩薩	入佛甘露智慧門
歷劫得道慈氏尊	以大悲心而啟問	善哉無垢法王子	智慧能問真佛乘
我以獅子無畏辯	說大乘中趣覺路	汝等一心善諦聽	轉授未來所應授
十方世界可使空	無令斷盡出世道		
將求解脫出世道	不過三根九品類	上根三品居蘭若	中下隨緣化世間
所求道果等無差	同證真如佛性海		
已獲無漏真大士	隨宜應現濟群生	開示有空不二門	自利利他無間斷
未得無漏諸佛子	應正勤修三種學	善根迴向施眾生	一心專念佛菩薩
願我常睹佛菩薩	無邊莊嚴功德身	若使恒聞法雨音	普得同霑心不退

以身常處於地獄	非不親近大慈尊	以身常處於輪迴	非不親聞微妙法
以是因緣諸佛子	繫心常念天人師		
若有佛子修聖道	發起無上菩提心	厭世住於蘭若中	亦得名修三種度
每日自食先布施	兼將法寶施眾生	三輪清淨是檀那	以此修因德圓滿
當知證獲波羅蜜	唯由心淨不由財	若有染心施珍財	不如淨心施少分
財施即得名檀度	此波羅蜜非二三	能施身命及妻子	如是得名親近度
若有求法善男女	為說一切大乘經	令發無上菩提心	乃名真實波羅蜜
慈悲淨信具慚愧	攝受眾生離於貪	願成如來無上智	財法二施名初度
堅持菩薩三聚戒	開發菩提離生死	擁護佛法住世間	能悔誤犯真持戒
伏瞋恚心慈悲觀	當念宿因對怨害	不惜軀命救眾生	是名忍辱波羅蜜
能行難行不暫捨	三僧祇劫常增進	不共染污恒鍊心	為度有情求解脫
入出三昧得自在	變化神通遊十方	為斷眾生煩惱因	三摩地門求解脫
若欲成就真智慧	親近菩薩及如來	樂聞出世妙理門	修達三明斷二障
能知眾生心差別	隨病與藥令服行	慈悲善巧應根宜	方便利生度群有

觀一切法真句義 不著中邊離有無 淨智無間會真如 二利均平周法界
智力能了眾生性 為說相應種種法 智力能入眾生心 令斷輪迴生死本
智力能分黑白法 隨應取捨各了知 生死涅槃本平等 成就有情離分別
如是十種殊勝行 攝入八萬四千中 隨其品類勝法門 乃名菩薩波羅蜜
八萬四千三摩地 能滅眾生散亂心 八萬四千總持門 能除惑障消魔眾
大聖法王方便力 三種法要化眾生 教網垂於生死海 置彼人天安樂處
爾時，世尊說是法時，八萬四千忉利天子斷三界障，證歡喜地。

無數百千六欲天子悟無生忍，得陀羅尼。

十六大國王得聞持陀羅尼。

無量四眾聞菩薩行，或得不退地，或得三昧門，或得陀羅尼，或得大神通。

或有菩薩證二三地，乃至十地，踊躍歡喜。

無量百千諸人天等發阿耨多羅三藐三菩提心，不復退轉。

八千人天遠塵離垢，得法眼淨。

⑨ 功德莊嚴品

爾時，彌勒菩薩摩訶薩白佛言：世尊！如佛所說「住阿蘭若，功德成就，當得作佛。」

菩薩云何修諸功德，而能住是阿蘭若中？

惟願，世尊！為我解說。

爾時，佛告彌勒菩薩摩訶薩言：汝，善男子！當修學者，但有一德，是人應住阿蘭若處，求無上道。

云何為一？謂觀一切煩惱根源，即是自心。了達此法，堪能住止阿蘭若處。

所以者何？譬如狂犬，被人驅打，但逐瓦石，不逐於人。

未來世中，住阿蘭若新發心者，亦復如是。若見色聲香味觸法，其心染著。是人，不知煩惱根本，不知五境從自心生。即此名為未能善住阿蘭若處。

以是因緣，樂住寂靜，求無上道。

一切菩薩摩訶薩等，若五欲境現前之時，觀察自心。應作是念：「我從無始至于今日，輪迴六趣，無有出期，皆自妄心而生迷倒，於五欲境貪愛染著。」如是菩薩，名為堪住阿蘭若處。

若有人問：「何等有情，於未來世，當得作佛？」

應指「是人，於當來世，出三界苦，破四魔軍，速成菩提，入佛智慧。」

一切世間，天龍八部，阿蘇羅等，皆應供養。

若善男子及善女人，以清淨心，供養如是住阿蘭若真善佛子，所獲福德，無量無邊。

若復有人，以眾珍寶，供養悲母，所獲功德，亦無差別。

何以故？是人當得阿耨多羅三藐三菩提，轉正法輪，度人天眾，紹三寶種，使不斷絕，當為眾生作歸依故。

復次，善男子！有二種法，繫縛行者，令不堪任住阿蘭若：

①愛樂斷見邪法，②愛樂財寶樂具。

又，善男子！有二種人，不堪居住阿蘭若處：

①具足憍慢，②惡大乘法。

又，善男子！有二種人，不應居住阿蘭若處：

①邪見，不信佛語。②身自破戒，策役持戒。

如是等人，不應居住阿蘭若處求無上道。

復次，善男子！具四種德，應當安住阿蘭若處。

云何為四？①多聞，總持不忘。②分明，能解妙義。③正念，常不放逸。④隨順，如教而行。

善男子！若有佛子，成就如是四種勝德，應當安住阿蘭若處，修菩薩行，求無上道。

復次，善男子！出家菩薩，復有四德，莊嚴自身，住阿蘭若，求佛智慧。

云何為四？①大慈，②大悲，③大喜，④大捨。

善男子！如是四法，能生一切福德智慧，利益安樂無量眾生，速證無上大菩提法。

復次，善男子！出家菩薩，復有四德，持戒清淨，能至菩提。

云何為四？

①恒住四無垢性，

②常行十二頭陀，

③遠離在家出家，

④永離諂誑嫉妒。

善男子！一切菩薩，依此四法，永離生死，得大菩提。

復次，善男子！出家菩薩，復有四法，攝一切善。

云何為四？

①淨持禁戒，復有多聞。

②入諸三昧，能具智慧。

③得六神通，兼修種智。

④善巧方便，又不放逸。

善男子！如是四法，三世菩薩共所修學。汝等佛子亦應修習，疾證廣大無上菩提。

復次，善男子！出家菩薩具四種法，於菩薩行得不退轉。

云何為四？①布施，②愛語，③利行，④同事。

善男子！如是四行，趣菩提路，利生根本，一切菩薩皆應修學。

復次，善男子！出家菩薩，復具四德，住於阿蘭若，持戒清淨，莊嚴自身。
云何為四？

①觀察自無本性，伏斷二執，證無我故。

②他身亦無本性，於怨親所，離憎愛故。

③身心快樂，心心所法，無分別故。

④得平等智，生死涅槃，無差別故。

善男子！如是四法，一切菩薩所應修習，汝等佛子亦當修習，速趣無上正等菩提。

復次，善男子！一切菩薩，復有四願，成熟有情，住持三寶，經大劫海，終不退轉。

云何為四？

①誓度一切眾生，②誓斷一切煩惱，③誓學一切法門，④誓證一切佛果。

善男子！如是四法，大小菩薩皆應修學，三世菩薩所學處故。

復次，善男子！出家菩薩，復有四法，住阿蘭若，持戒清淨。

云何為四？

①愛樂空性，空所顯故。

②得無恐怖，證三昧故。

③於諸眾生，起大悲願。

④於二無我，無厭背心。

善男子！如是四法，一切菩薩入聖要門，依此四法，斷二障故。

復次，善男子！出家菩薩，復有四法，住阿蘭若，善持禁戒，莊嚴其身。

云何為四？

①永捨我見，②捨我所見，③離斷常見，④深能悟解十二因緣。

善男子！如是四法，能除毀禁，守護淨戒，莊嚴其身。

復次，善男子！出家菩薩，住阿蘭若，又觀四法，能護禁戒，妙行增修，趣求佛智。

云何為四？

①觀察五蘊生滅。

②觀十二處，如空聚落。

③觀十八界性同法界。

④於俗諦法，無捨無著。

善男子！如是四法，一切菩薩所應修學。

是故，佛子住阿蘭若，一心修習，求無上道。

復次，善男子！出家菩薩，住阿蘭若，具足四種持戒清淨，莊嚴自身。

云何為四？

①成就不見身觀。②成就不見語觀。③成就不見意觀。

④遠離六十二見，善能成就一切智觀。

善男子！若有佛子，成就如是四種清淨，現身證獲正性離生，乃至速證無上菩提。

以是因緣，汝等佛子觀如是等四種法門，斷四惡道、證四涅槃。盡未來際，度諸有情，令證阿耨多羅三藐三菩提。

復次，善男子！出家菩薩，住阿蘭若，具足八種三昧清淨，莊嚴自身。

云何為八？

- ①獨坐蘭若三昧清淨。
- ②遠離綺語三昧清淨。
- ③遠離五欲三昧清淨。
- ④調伏身心三昧清淨。
- ⑤飲食知足三昧清淨。
- ⑥遠離惡求三昧清淨。
- ⑦遠離因聲起愛三昧清淨。
- ⑧為眾說法不求利養三昧清淨。

善男子！如是八種三昧清淨，能生百千諸三昧門。汝等佛子應當修習，速證無上正等菩提。

復次，善男子！出家菩薩住阿蘭若，復有八種智慧清淨。

云何為八？

- ①五蘊善巧智慧清淨。

- ②十二處善巧智慧清淨。
- ③十八界善巧智慧清淨。
- ④二十二根善巧方便智慧清淨。
- ⑤三解脫門善巧方便智慧清淨。
- ⑥能滅一切煩惱善巧方便智慧清淨。
- ⑦能滅隨煩惱善巧方便智慧清淨。
- ⑧能滅六十二見善巧方便智慧清淨。

善男子！如是八種智慧清淨，汝等菩薩當勤修習，速證無上正等菩提。
復次，善男子！出家菩薩，住阿蘭若，復有八種神通清淨，莊嚴自身。
云何為八？

- ①於諸色法，得無障礙天眼善巧方便神通清淨。
- ②於諸聲境，得無障礙天耳善巧方便神通清淨。
- ③於諸眾生心心所法，得無障礙他心智善巧方便神通清淨。
- ④憶念過去生處死處，得無障礙宿住智善巧方便神通清淨。

⑤能往十方無數佛刹，得無障礙神境智善巧方便神通清淨。

⑥能知眾生漏盡未盡，得無障礙漏盡智善巧方便神通清淨。

⑦能滅一切煩惱，得無障礙無漏智善巧方便神通清淨。

⑧現見自身一切善根，迴向眾生善巧方便神通清淨。

善男子！如是八種神通清淨，十方菩薩同所修學。汝等菩薩亦應修習，速證無上正等菩提。

復次，善男子！出家菩薩，住阿蘭若，現身獲得八種清淨。

云何為八？

①身業清淨。②語業清淨。③意業清淨。④正性清淨。

⑤正命清淨。⑥頭陀清淨。⑦離諂清淨。⑧一念不忘菩提心清淨。

善男子！若有佛子，住阿蘭若，具足如是八種清淨，現身成就無邊善根，不復退轉阿耨多羅三藐三菩提。

復次，善男子！出家菩薩，復有八種多聞清淨，莊嚴自身。

云何為八？

- ①尊敬和上阿闍梨，多聞清淨。
- ②遠離憍慢，生謙下心，多聞清淨。
- ③精進勇猛，多聞清淨。
- ④安住正念，多聞清淨。
- ⑤為求法者，說甚深義，多聞清淨。
- ⑥不愛自讚毀他，多聞清淨。
- ⑦常能觀察一切善法，多聞清淨。
- ⑧聽聞正法，如說修行，多聞清淨。

善男子！如是八種多聞清淨，汝等菩薩皆應修習，速證無上正等菩提。

爾時，世尊說如是等菩薩行已，告彌勒菩薩摩訶薩言：善男子！我涅槃後，後五百歲，法欲滅時，無量眾生厭離世間，渴仰如來，發阿耨多羅三藐三菩提心，入阿蘭若，為無上道，修習如是菩薩願行，於大菩提得不退轉。

如是發心無量眾生，命終上生睹史天宮，得見汝身無邊福智之所莊嚴，超越生死，證不退轉。於當來世，大寶龍花菩提樹下，得阿耨多羅三藐三菩提。

爾時，世尊說是法時。二萬五千新發意菩薩，於菩提行，將欲退轉，聞如是法，發堅固心，超十信位，至第六住。

三萬八千淨行婆羅門永斷邪見，得大法忍，及陀羅尼。

七萬六千人皆發無等等阿耨多羅三藐三菩提心。

⑩ 觀心品

爾時，文殊師利菩薩摩訶薩，即從座起，整衣服，偏袒右肩，右膝著地，曲躬合掌。

白佛言：世尊！如佛所說，告妙德等五百長者：「我為汝等，敷演心地微妙法門。」

而此道場，無量無邊人天大眾，皆生渴仰。

我今為是，啟問如來：云何為心？云何為地？

惟願，世尊！無緣大慈，無礙大悲，為諸眾生，分別演說。未離苦者，令得離苦。未安樂者，令得安樂。未發心者，令得發心。未證果者，令得證果。同於一道，而得涅槃。

爾時，薄伽梵以無量劫中修諸福智，所獲清淨決定勝法大妙智印，印文殊師利。

言：善哉！善哉！汝今真是三世佛母。一切如來，在修行地，皆曾引導初發信心。以是因緣，十方國土成正覺者，皆以文殊而為其母。然今，汝身以本願力現菩薩相，請問如來不思議法。

諦聽！諦聽！善思念之，吾當普為分別解說。

唯然，世尊！我等樂聞。

爾時，薄伽梵，妙善成就，一切如來最勝住持，平等性智，種種希有微妙功德。已能善獲一切諸佛決定勝法大乘智印，已善圓證一切如來金剛祕密殊勝妙智，已能安住無礙大悲，自然救攝十方有情。已善圓滿妙觀察智，不觀而觀、不說而說。

是薄伽梵，告諸佛母無垢大聖文殊師利菩薩摩訶薩言：大善男子！此法名為十方如來最勝祕密心地法門。

此法，名為一切凡夫入如來地頓悟法門。

此法，名為一切菩薩趣大菩提真實正路。

此法，名為三世諸佛自受法樂微妙寶宮。

此法，名為一切饒益有情無盡寶藏。

此法，能引諸菩薩眾到色究竟自在智處。

此法，能引詣菩提樹後身菩薩真實導師。

此法，能雨世出世財如摩尼寶滿眾生願。

此法，能生十方三世一切諸佛功德本源。

此法，能消一切眾生諸惡業果。

此法，能與一切眾生所求願印。

此法，能度一切眾生生死險難。

此法，能息一切眾生苦海波浪。

此法，能救苦惱眾生而作急難。

此法，能竭一切眾生老病死海。

此法，善能出生諸佛因緣種子。

此法，能與生死長夜為大智炬。

此法，能破四魔兵眾而作甲冑。

此法，即是正勇猛軍戰勝旌旗。

此法，即是一切諸佛無上法輪。

此法，即是最勝法幢。

此法，即是擊大法鼓。

此法，即是吹大法螺。

此法，即是大獅子王。

此法，即是大獅子吼。

此法，猶如國大聖王，善能正治。若順王化，獲大安樂。若違王化，尋被誅滅。

善男子！三界之中，以心為主。

能觀心者，究竟解脫。不能觀者，究竟沉淪。

眾生之心，猶如大地。五穀五果，從大地生。

如是，心法，生世出世善惡五趣、有學、無學、獨覺、菩薩，及於如來。
以是因緣，三界唯心，心名為地。

一切凡夫，親近善友，聞心地法，如理觀察，如說修行，自作教他，讚勵慶慰。如是之人，能斷三障，速圓眾行，疾得阿耨多羅三藐三菩提。

爾時，大聖文殊師利菩薩白佛言：世尊！如佛所說「唯將心法為三界主」。
心法本無，不染塵穢。云何心法染貪瞋癡？

於三世法，誰說為心？過去心已滅，未來心未至，現在心不住。

諸法之內，性不可得。諸法之外，相不可得。諸法中間，都不可得。

心法本來無有形相，心法本來無有住處。

一切如來尚不見心，何況餘人得見心法！

一切諸法，從妄想生。以是因緣，今者世尊為大眾說三界唯心。

願佛哀愍，如實解說。

爾時，佛告文殊師利菩薩言：如是。如是，善男子！如汝所問。心心所法，本性空寂。

我說眾喻，以明其義。善男子！

心如幻法，由遍計生，種種心想，受苦樂故。

心如流水，念念生滅，於前後世，不暫住故。

心如大風，一剎那間，歷方所故。

心如燈焰，眾緣和合，而得生故。

心如電光，須臾之頃，不久住故。

心如虛空，客塵煩惱所覆障故。

心如猿猴，遊五欲樹，不暫住故。

心如畫師，能畫世間種種色故。

心如僮僕，為諸煩惱所策役故。

心如獨行，無第二故。

心如國王，起種種事，得自在故。

心如怨家，能令自身，受大苦故。

心如埃塵，坌污自身，生雜穢故。

心如影像，於無常法，執為常故。

心如幻夢，於無我法，執為我故。

心如夜叉，能啖種種功德法故。

心如青蠅，好穢惡故。

心如殺者，能害身故。

心如敵對，常伺過故。

心如盜賊，竊功德故。

心如大鼓，起鬥戰故。

心如飛蛾，愛燈色故。

心如野鹿，逐假聲故。

心如群豬，樂雜穢故。

心如眾蜂，集蜜味故。

心如醉象，耽牝觸故。

善男子！如是所說心心所法，無內無外，亦無中間。於諸法中，求不可得。

去來現在亦不可得，超越三世。非有非無，常懷染著，從妄緣現。緣無自性，心性空故。

如是空性，不生不滅，無來無去，不一不異，非斷非常。本無生處，亦無滅處。亦非遠離，非不遠離。如是心等，不異無為。無為之體，不異心等。心法之體，本不可說。非心法者，亦不可說。

何以故？若無為，是心即名斷見。若離心法，即名常見。永離二相，不著二邊。

如是悟者，名見真諦。悟真諦者，名為賢聖。

一切賢聖，性本空寂。無為法中，戒無持犯，亦無大小。無有心王，及心所法，無苦無樂。如是，法界自性無垢，無上中下差別之相。

何以故？是無為法，性平等故。

如眾河水，流入海中，盡同一味，無別相故。

此無垢性，是無等等，遠離於我，及離我所。

此無垢性，非實非虛。

此無垢性，是第一義，無盡滅相，體本不生。

此無垢性，常住不變，最勝涅槃，我樂淨故。

此無垢性，遠離一切平等不平等，體無異故。

若有善男子善女人，欲求阿耨多羅三藐三菩提者，應當一心修習如是心地觀法。

爾時，世尊欲重宣此義，而說偈言：

三世覺母妙吉祥	請問如來心地法		
我今於此大會眾	開演成佛觀行門	此法難遇過優曇	一切世間應渴仰
十方諸佛證大覺	無不從此法修成	我是無上調御師	轉正法輪周世界
化度無量諸眾生	當知由悟心地觀		
一切有情聞此法	欣趣菩提得授記	一切有緣得記人	修此觀門當作佛
諸佛自受大法樂	住心地觀妙寶宮	受職菩薩悟無生	觀心地門遍法界
後身菩薩坐覺樹	入此觀行證菩提	此法能雨七聖財	滿眾生願摩尼寶
此法名為佛本母	出生三世三佛身	此法名為金剛甲	能敵四眾諸魔軍

此法能作大舟航	令渡中流至寶所	此法最勝大法鼓	此法高顯大法幢
此法金剛大法螺	此法照世大法炬	此法猶如大聖主	賞功罰過順人心
此法猶如沃潤田	生成長養依時候	我以眾喻明空義	
是知三界唯一心	心有大力世界生	自在能為變化主	惡想善心更造集
過現未來生死因	依止妄業有世間	愛非愛果恒相續	
心如流水不暫住	心如飄風過國土	亦如猿猴依樹戲	亦如幻事依幻成
如空飛鳥無所礙	如空聚落人奔走	如是心法本非有	凡夫執迷謂非無
若能觀心體性空	惑障不生便解脫		

爾時，如來於諸眾生，起大悲心，猶如父母愛念一子，為滅世間大力邪見，利益安樂一切有情，宣說觀心陀羅尼，曰：

唵 室他 波羅底 吠憚 迦盧弭

爾時，如來說真言已，告文殊師利菩薩摩訶薩：如是神咒，具大威力，若有善男子善女人，持此咒時，舉清淨手，左右十指更互相叉，以右押左，更相堅握，如縛著形，名金剛縛印。成此印已，習前真言，盈滿一遍。

勝於讀習十二部經。所獲功德，無有限量。乃至菩提，不復退轉。

⑪ 發菩提心品

爾時，薄伽梵已能善獲一切如來灌頂寶冠超過三界，已得圓滿陀羅尼自在，已善圓證三摩地自在，妙善成就一切智智、一切種智，能作有情種種差別。

時，薄伽梵為諸眾生宣說觀心妙法門已。

告文殊師利菩薩摩訶薩言：大善男子！我為眾生已說心地，亦復當說發菩提心大陀羅尼，令諸有情，發阿耨多羅三藐三菩提心，速圓妙果。

爾時，文殊師利菩薩白佛言：世尊！如佛所說：「過去已滅，未來未至，現在不住，三世所有一切心法，本性皆空。」彼菩提心，說何名發？

善哉，世尊！願為解說，斷諸疑網，令趣菩提。

佛告文殊師利：善男子！諸心法中，起眾邪見。為欲除斷六十二見、種種見故，心心所法，我說為空。如是諸見，無依止故。

譬如叢林，蒙密茂盛，獅子、白象、虎、狼，惡獸，潛住其中，毒發害人，迴絕行跡。時，有智者以火燒林。因林空故，諸大惡獸，無復遺餘。

心空見滅，亦復如是。

又，善男子！以何因緣，立空義耶？為滅煩惱，從妄心生，而說是空。

善男子！若執空理為究竟者，空性亦空。執空作病，亦應除遣。

何以故？若執空義為究竟者，諸法皆空，無因無果。路伽耶陀，有何差別？

善男子！如阿伽陀藥，能療諸病。若有病者，服之必瘥。其病既愈，藥隨病除。無病服藥，藥還成病。

善男子！本設空藥，為除有病。執有成病，執空亦然。誰有智者服藥取病？

善男子！若起有見，勝起空見。空治有病，無藥治空。

善男子！以是因緣，服於空藥。除邪見已，自覺悟心，能發菩提。此覺悟心即菩提心，無有二相。

善男子！自覺悟心，有四種義。云何為四？

謂：諸凡夫，有二種心。諸佛菩薩，有二種心。

善男子！凡夫二心，其相云何？

①眼識乃至意識，同緣自境，名自悟心。

②離於五根，心心所法，和合緣境，名自悟心。

善男子！如是二心，能發菩提。

善男子！賢聖二心，其相云何？

①觀真實理智，②觀一切境智。

善男子！如是四種，名自悟心。

爾時，文殊師利菩薩白佛言：世尊！心無形相，亦無住處。

凡夫行者，最初發心，依何等處？觀何等相？

佛言：善男子！凡夫所觀菩提心相，猶如清淨圓滿月輪，於胸臆上，明朗而住。若欲速得不退轉者，在阿蘭若及空寂室，端身正念，結前如來金剛縛印，冥目觀察臆中明月，作是思惟：「是滿月輪五十由旬，無垢明淨，內外澄澈，最極清涼。月即是心，心即是月，塵翳無染，妄想不生，能令眾生身心清淨，大菩提心堅固不退。」結此手印，持念觀察大菩提心微妙章句，一切菩薩最初發心清淨真言：

唵 菩地 室多 牟致波 陀耶 弭

此陀羅尼，具大威德，能令行者不復退轉。去來現在一切菩薩，在於因地，初發心時，悉皆專念。持此真言，入不退地，速圓正覺。

善男子！時，彼行者端身正念，都不動搖，繫心月輪，成熟觀察，是名菩薩觀菩提心成佛三昧。

若有凡夫修此觀者，所起五逆、四重、十惡，及一闡提，如是等罪，盡皆消滅。

即獲五種三摩地門。

云何為五？①剎那三昧。②微塵三昧。③白縷三昧。④起伏三昧。⑤安住三昧。

云何名為剎那三昧？

謂：暫想念滿月而住。譬如獼猴，身有所繫，遠不得去、近不得停，唯困飢渴，須臾住止。凡夫觀心亦復如是。暫得三昧，名為剎那。

云何名為微塵三昧？

謂：於三昧少分相應。譬如有人，常自食苦，未曾食甜。於一時中，得一塵

蜜，到於舌根，增勝歡喜，倍生踊躍，更求多蜜。如是，行者經於長劫，食眾苦味，而今得與甘甜三昧，少分相應，名為微塵。

云何名為白縷三昧？

謂：凡夫人，自無始時盡未來際，今得此定。譬如染皂，多黑色中，見一白縷。如是，行者於多生死黑闇夜中，而今方得白淨三昧，名之為縷。

云何名為起伏三昧？

所謂：行者觀心未熟，或善成立、未善成立。如是三昧，猶稱低昂，名為起伏。

云何名為安住三昧？

修前四定，心得安住，善能守護，不染諸塵。如人，夏中遠涉沙磧，備受炎毒，其心渴乏，殆無所堪，忽得雪山甘美之水、天酥陀等，頓除熱惱，身意泰然。是故三昧，名為安住。

入此定已，遠離惑障，發生無上菩提之芽，速登菩薩功德十地。

爾時，會中無量人天聞此甚深諸菩薩母不可思議大陀羅尼已，九萬八千諸菩

薩等證歡喜地，無量眾生發阿耨多羅三藐三菩提心。

⑫ 成佛品

爾時，薄伽梵能善安住清淨法界。三世平等，無始無終。不動凝然，常無斷盡。大智光明，普照世界。善巧方便，變現神通。化十方土，靡不周遍。

是薄伽梵告文殊師利菩薩摩訶薩言：瑜伽行者，觀月輪已，應觀三種大祕密法。

云何為三？①心祕密，②語祕密，③身祕密。

云何名為心祕密法？

瑜伽行者，觀滿月中，出生金色五鈷金剛，光明煥然，猶如鎔金，放於無數大白光明。以是觀察，名心祕密。

云何名為語言祕密法？

唵 地室多婆爾羅

此陀羅尼，具大威力，一切菩薩成佛真言。是故，名為語言祕密。

云何名為身祕密法？

於道場中，端身正念，手結引導無上菩提最第一印，安置胸臆心月輪中。

善男子！我當為汝說其印相。

先以左右二大拇指，各入左右手掌之內，各以左右頭指中指及第四指，堅握拇指，作於手拳，即是堅牢金剛拳印。次不改拳，舒左頭指，直豎虛空，以其左拳，著於心上。右拳小指，堅握左拳頭指一節。次以右拳頭指之頭，即指左拳拇指一節，亦著心前。

是名引導無上菩提第一智印，亦名能滅無明黑闇大光明印。以結此印，加持力故，十方諸佛摩行者頂，授大菩提勝決定記。是大毘盧遮那如來無量福聚大妙智印。

爾時，行者結此印已，即作此觀：「一切有情，共結此印，持念真言。十方世界，無三惡道、八難苦果，同受第一清淨法樂。我今首上有大寶冠，其天冠中，五佛如來結跏趺坐。我是毘盧遮那如來，圓滿具足三十二相八十種好，放大光明，照十方界，利益安樂一切眾生。」

如是觀察，名入毘盧遮那如來最勝三昧。

譬如有人，悟迦盧羅微妙觀門，自作是觀「我身即是金翅鳥王」。心意語言亦復如是。以此觀力，能消毒藥。一切惡毒，不能為害。

凡夫行者，亦復如是。作降伏坐，身不動搖，手結智印，密念真言，心入此觀，能滅三毒，消除業障，增長福智，世出世願速得圓滿，八萬四千諸煩惱障不能現起，恒河沙等所知重障漸漸消滅，無漏大智能斷金剛般若波羅蜜現前圓滿，速得阿耨多羅三藐三菩提。

爾時，文殊師利菩薩白佛言：希有，世尊！希有，善逝！如來出世，過優曇花，假使出世，說是法難，如是心地三種祕密無上法輪，實能利樂一切眾生，入如來地及菩薩地真實正路。若有眾生，不惜身命，修行此法，速證菩提。

爾時，佛告文殊師利菩薩言：若有善男子善女人，欲得修習三種祕密成佛妙門，早獲如來功德身者，當著菩薩三十二種大金剛甲，修此妙觀，必證如來清淨法身。

云何名為三十二甲？

①於無量劫，為眾生故，不厭生死。受苦大甲。

- ②誓度無量有情，乃至螻蟻。不捨大甲。
- ③覺悟眾生生死長夢，安置三種。祕密大甲。
- ④擁護佛法，於一切時，猶如響應。護法大甲。
- ⑤永滅能起有無二見一切煩惱。金剛大甲。
- ⑥頭目髓腦、妻子珍寶，有來求者。能捨大甲。
- ⑦家中所受一切樂具，永不貪著。能施大甲。
- ⑧能持菩薩三聚淨戒，終不捨離。頭陀大甲。
- ⑨著忍辱衣，遇諸違緣毀罵鞭打。不報大甲。
- ⑩教化所有一切緣覺聲聞，令趣一乘。迴心大甲。
- ⑪譬如大風，晝夜不歇，度諸有情。精進大甲。
- ⑫身心寂靜，口無過犯，修行解脫。三昧大甲。
- ⑬生死涅槃，無有二見，饒益眾生。平等大甲。
- ⑭無緣大慈，利益群品，恒無厭捨。與樂大甲。
- ⑮無礙大悲，救攝一切，無有限量。拔苦大甲。

- ①⑥於諸眾生，無有怨結，恒作饒益。大喜大甲。
- ①⑦雖行苦行，不憚劬勞，恒無退轉。大捨大甲。
- ①⑧有苦眾生，來菩薩所，代彼受苦。不厭大甲。
- ①⑨如觀掌中阿摩勒果，如是能見。解脫大甲。
- ②⑩見五蘊身，如旃陀羅，損害善事。無著大甲。
- ②⑪見十二入，如空聚落，常懷恐怖。厭捨大甲。
- ②⑫見十八界，猶如幻化，無有真實。大智大甲。
- ②⑬見一切法，同於法界，不見眾相。證真大甲。
- ②⑭掩他人惡，不藏己過，厭離三界。出世大甲。
- ②⑮如大醫王，應病與藥，菩薩隨宜。演化大甲。
- ②⑯見彼三乘，體本不異，究竟迴心。歸一大甲。
- ②⑰紹三寶種，使不斷絕，轉妙法輪。度人大甲。
- ②⑱佛於眾生，有大恩德，為報佛恩。修道大甲。
- ②⑲觀一切法，本性空寂，不生不滅。無垢大甲。

③⑩悟無生忍，得陀羅尼，樂說辯才。無礙大甲。

③⑪廣化有情，坐菩提樹，令證佛果。一味大甲。

③⑫一剎那心，般若相應，悟三世法。無餘大甲。

是名菩薩摩訶薩三十二種金剛大甲。

文殊師利菩薩！若有善男子善女人身被如是金剛甲冑，當勤修習三種祕密，於現世中，具大福智，速證無上正等菩提。

爾時，大聖文殊師利菩薩摩訶薩及諸大眾，聞佛所說三種祕密心地妙法，及三十二金剛甲冑，一切菩薩所應學處。各脫無價瓔珞寶衣，供養毘盧遮那如來及十方尊，而讚佛言：善哉！善哉！佛薄伽梵演說無邊菩薩行願，利益安樂一切眾生，捨凡夫身，使入佛地。

今者，我等海會大眾，為報佛恩，不惜身命。為諸眾生，遍諸佛土，分別演說此微妙法，受持、讀誦、書寫、流布，令不斷絕。

惟願，如來！遙垂護念。

爾時，大會聞此妙法，得大饒益。

不可稱計無數菩薩，各得證悟不退轉位。

一切人天，皆獲勝利。

乃至五趣一切有情，斷諸重障，得無量樂，悉皆當得阿耨多羅三藐三菩提。

⑬ 囑累品

爾時，釋迦牟尼如來告文殊師利菩薩等阿僧祇海會大眾言：

我於無量那庾多百千大劫，不惜身命，頭目手足、血肉骨髓、妻子國城、一切珍寶。有來求者，悉用布施。修習百千難行苦行，獲證大乘心地觀門。

今以此法，付囑汝等。汝等！當知此甚深經，十方三世無上十力之所宣說。如是經寶，最極微妙，能為有情，一切利樂。

於此三千大千世界十方諸佛國土之中，所有無邊諸有情類，傍生、餓鬼、地獄眾生，由此《大乘心地觀經》殊勝功德，威神之力，令離諸苦，得受安樂。

如是經力，福德難思，能令所在國土豐樂，無諸怨敵。

譬如有人，得如意珠，置於家中，能生一切殊妙樂具。此妙經寶亦復如是，能與國界無盡安樂。

亦如三十三天末尼天鼓，能出種種百千音聲，令彼天眾，受諸快樂。此經法鼓亦復如是，能令國界最勝安樂。

以是因緣，汝等大眾，住大忍力，流通此經。

爾時，文殊師利菩薩，白佛言：世尊！希有，如來！希有，善逝！乃說甚深《大乘微妙心地觀經》，能廣利益大乘行者。

唯然，世尊！實為深妙。

若有善男子善女人，能持此經，乃至一四句偈。如是之人，得幾所福？

爾時，薄伽梵告文殊師利菩薩言：若有善男子善女人，於恒河沙三千大千世界滿中七寶，以用供養十方諸佛。為一一佛，造立精舍，七寶莊嚴，安置供養佛及菩薩，滿恒沙劫。彼諸如來所有無量聲聞弟子，亦以供養一切所須，如供養佛，等無差別。如是諸佛及聲聞等，般涅槃後，起大寶塔，供養舍利。

若善男子善女人，暫聞信解此《心地經》一四句偈，發菩提心，受持讀念、解說、書寫，乃至極少，為一人說。

以彼種種供養功德，比此說經所獲功德，十六分中不及其一，乃至算數譬喻

所不能及，況能具足受持、讀習、廣為人說！所得福利，不可限量。

若有女人，發菩提心，受持、讀習、書寫、解說此《心地經》。

如是女人，為最後身，更不復受，不墮惡道八難之處。

於現身中，感得十種勝利之福：

- ①增益壽命，②除眾病惱，③能滅業障，④福智皆增，⑤不乏資財，
- ⑥皮膚潤澤，⑦為人愛敬，⑧得孝養子，⑨眷屬和睦，⑩善心堅牢。

文殊師利！在在處處，若讀、若諷、若解說、若書寫，若經卷所住之處，即是佛塔。一切天、龍、人非人等，應以人中天上上妙珍寶而供養之。

所以者何？若此經典所在之處，即為有佛及諸菩薩、緣覺、聲聞。

何以故？一切如來，修行此經，捨凡夫已，得阿耨多羅三藐三菩提。一切賢聖，皆從此經得解脫故。

文殊師利！我涅槃後後五百歲，法欲滅時，若有法師，受持、讀習、解說、書寫此《心地經》，眾經中王。如是法師，與我無異。

若有善男子善女人，供養尊重此法師者，即為供養十方三世一切諸佛。所得

福德，平等無二，是名真法供養如來。如是，名為正行供養。

所以者何？是大法師，在無佛時，為濁惡世邪見有情，演說甚深《心地》經王，使離惡見，趣菩提道，廣宣流布，令法久住。

如是，名為無相好佛，一切人天所應供養。

若有善男子善女人，合掌恭敬此法師者。我授無上大菩提記：「是人，當得阿耨多羅三藐三菩提。」

若人得聞此《心地經》，為報四恩，發菩提心，若自書若使人書，若讀念通利。

如是人等，所獲福德，以佛智力籌量多少，不得其邊。

是人，名為諸佛真子。

一切諸天、梵王帝釋、四大天王、訶利底母五百眷屬、你羅跋多大鬼神王、龍神八部、一切聽法諸鬼神等，晝夜不離，常當擁護。

如是佛子，增長念慧，與無礙辯，教化眾生，令種佛因。

文殊師利！如是善男子善女人，臨命終時，現前得見十方諸佛，三業不亂。

初獲十種身業清淨。

云何為十？

①身不受苦，②目睛不露，③手不掉動，④足無伸縮，⑤便溺不遺，
⑥體不汗流，⑦不外捫摸，⑧手拳舒展，⑨顏容不改，⑩轉側自如。

由經力故，有如是相。

次獲十種語業清淨。

云何為十？

①出微妙語，②出柔軟語，③出吉祥語，④出樂聞語，⑤出隨順語，
⑥出利益語，⑦出威德語，⑧不背眷屬，⑨人天敬愛，⑩讚佛所說。

如是善語，皆由此經。

次獲十種意業清淨。

云何為十？

①不生瞋恚，②不懷結恨，③不生慳心，④不生妒心，⑤不說過惡，
⑥不生怨心，⑦無顛倒心，⑧不貪眾物，⑨遠離七慢，

⑩樂欲證得一切佛法圓滿三昧。

文殊師利！如是功德，皆由受持讀習通利，解說書寫深妙經典，難思議力。

此《心地經》，於無量處，於無量時，不可得聞，何況得見具足修習！

汝等大會！一心奉持，速捨凡夫，當成佛道。

爾時，文殊師利法王子等無量大菩薩、智光菩薩等新發意菩薩、阿若憍陳如等諸大聲聞、天龍八部、人非人眾，各各一心，受持佛語，皆大歡喜，信受奉行。

大乘本生心地觀經

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地青山公路18號 mfbm.hk